

先祖寄吳花宜先生滇中詩冊

癸丑春初敬彊前輩歸昇在守章識





太師誠意伯劉文成公集卷之九

巡按直隸監察御史縉雲後學樊獻科編次

賦

述志賦

鮮余生之眇眇兮荷后皇之深仁具五氣以成形兮受明命  
而為人體乾坤之粹精兮晞日月之景光漱飛泉之華滋兮  
浥灑露之醇英製杜蘅以為衣兮藉菴若之菲菲佩琳琅之  
玲瓏兮帶文藻之葳蕤朝濯髮于蘭池兮夕偃息乎瓊苑顧  
馳騫以遠遊兮及白日之未晚駕輕軺之將將兮服蒼虬之  
駉駉遵大路以周流兮曳虹蜺之委蛇挾長離而乘鸞兮歎



閭闔之九門豐隆為余先導兮百靈為余駿奔前燭陰以啓  
途兮颺凱風使清埃覲北斗于文昌兮朝玉皇于帝臺食玄  
圃之丹雘兮澡天潢之芳津激微焱于桂枝兮輕波起而龍  
鱗清都不可久留兮忽乘雲而遐征浮江湖之浩漭兮陵  
山嶽之崢嶸野莽蒼以多榛兮路險隘而紆曲猥猥魚然而  
攫噬兮蝮蛇蛇虺以當陸鬱忡忡以怵惕兮適皇皇以營營  
雨淫淫而不止兮霧黯黯以晝冥烏鳶號以成群兮鳳孤棲  
而無所楚屈原之獨醒兮衆皆以之為咎欲振迅以高舉兮  
無六翮以奮飛將抑志以從俗兮非余心之所怡長太息以  
增歎兮哀時世之異常棄韶夏而非聽兮登傑侏于中堂茅

軒于以和羹兮腌鮑魚而實俎斲榘楠以給爨兮束荆棘而  
為柱施罾麗于丘陵兮怨魴鯉之弗獲虎兕逸于山林兮循  
戶庭以求索前蒙眛以指途兮疆楊子使操轅命侏儒令舉  
鼻兮則都盧使守閭歲冉冉而將頽兮日曖曖以就昧松栢  
摧而根死兮江河化而為澮秣余馬于不周兮整余轡於樊  
桐無著龜以决疑兮迷不知余所從搏扶搖以為輿兮攬列  
缺以為軒駮青鸞之芟芟兮超烟靄而上浮梁天津以濟河  
兮睇紫微之神闕開明怒目而電視兮貔豹吼而山裂進無  
人以為之先容兮欲自獻而不敢氣勃鬱以憑中兮心惻傷  
以惛慄過少微而歷明堂兮就軒轅而陳情雷霆砰其隱轡



兮馬辟易而不行訪六符于泰階兮求民極之所在咎繇不  
可以作兮競狂直以為罪凌天街以徑度兮造旬始而瞻西  
清衆畏讒而卷舌兮孰能白予之忠誠怙悻其無止兮默情  
情以狐疑要傳說于箕尾兮命靈龜使占之曰有名必有實  
兮若形影之相因相福極出自天兮又何尤乎世之人鼎胡  
峙而不烹兮旗胡張而弗麾孤不可以射侯兮駟不可以策  
而馳衆蠕蠕以朶頤兮若頽波之東趨謂暈翟為弗章兮愛  
羸豕之負塗方不可利而規兮白不可涅而黑悲桂椒之芬  
芳兮與朝菌而偕落殷比干之剖心兮時豈不知其為聖人  
魯仲尼之過化兮馬後後而無所容其身由疆義而罹殃兮

惠直道而被黜子胥忠而殞命兮伯夷清而不食將登山而  
迷路兮欲涉水而無航東西南北安所之兮顧焉擇其所長  
神冥冥而不下兮龜又厭而弗告思糾結而不抽兮意恍惚  
以震悼忽濫汜以遐舉兮行遊目於大荒羲和不可扳而留  
兮恐年歲之弗將駕廣漠而南征兮叫重華于九疑山岑岑  
以蔽天兮江淼淼而不可窺遭吾道夫西隲兮聽鳴鳳于岐  
陽慨禾黍之離離兮梧桐摧而不生浮龍門以沂河兮訪夏  
后之遺跡川瀆混而不分兮鯨鯢起而人立攬駢轡而迴驚  
兮謁陶唐之舊京無衣裳以禦寒兮哀蟋蟀之悲鳴心悵悵  
以增傷兮神夢夢其若醉淚落落以交流兮憂湛湛而來會



傳說之版築兮無武丁其誰舉夷吾不逢夫鮑叔兮竟淪沒  
于囹圄推竭心以服勤兮上介山而立枯種霸越而滅吳兮  
終刎頸丁屬鏤樂毅升于金臺兮何遁逃而走趙周條侯之  
耿介兮卒含怨以餓餒忠有蔽而不昭兮道有塞而不行名  
不可疆而立兮功不可期而成李斯上書以相秦兮空自陷  
於罪尤買臣顯而僂辱兮豈如負薪之無憂魚赴餌以中鈞  
兮雉慕媒而膺鏑鳳凰翔于丹穴兮又何患乎矰弋逐余旃  
之旖旎兮還余車之鞶鞶采薇蕨于山阿兮擷芹藻于水濱  
列玄泉以瑩心兮坐素石以怡情聆嚶鳴之悅豫兮翫卉木  
之敷榮挹清風之泠泠兮照秋月之娟娟登高丘以詠歌兮

聊逍遙以永年

弔諸葛武侯賦

天地閉塞兮聖賢隱淪大旱焦土兮龍無所用其神當運命  
之厄窮兮堯舜且猶有極委厥軀以隨化兮亦哲人之所戚  
彼狂猾之縱悖兮履羿莽以滔天亂倫汨典兮流毒為淵夏  
少康之不作兮時又無湯與武蔽微不可以食兮焉眾眾而  
獨處睠三顧之疑懼兮躩高光之所為鳳凰非梧桐不棲兮  
于嗟去此其安歸瞻星芒于渭濱兮豈皇天之叛渙日曷不  
可使再中兮指桓靈而慨歎昔尼父之不逢兮寓斧鉞于春  
秋誅姦邪於既死兮開日月之昧幽歟紛紛以攘奪兮世不



以之為殃民彘泯滅猶一髮兮微斯人其孰明覽出師之貴  
表兮涕淫淫其如兩悲逝者之不回兮觀英風于萬古

弔祖豫州賦

汙池汀滯兮蛙黽樂之大鵬天遊兮燕雀謂女奚為狐狸冠  
裳兮梟獍堂宇支離節疏兮側身無所嗚呼將軍兮管葛之  
倫遭逢庸愚兮有志莫伸委棄九鼎兮烹鉞瓦釜截梁為杙  
兮東楹為柱偃背泰山兮依倚培塿圭璋砥礪兮沙礫瓊玖  
山陵暴骨兮社稷黍離故臣酸嘶兮行人涕洟卧薪嘗膽兮  
此維時矣宣光不作兮吁其悲矣烏號之徹札兮無養由以  
操之驕驕不逢伯樂兮與駑駘而並馳系日龍嘘而雲兮夫

豈不能自翔鴻鵠舉翮而千里兮又何必懷此鄉魚遊思故  
淵兮鳥棲思故林吾固知將軍之不忍兮惜庸夫之無心日  
曖曖以西傾兮時靡靡而就逝雁鴛群而喋呷兮鸞鳳友為  
所制世治亂之有數兮天亦無如之何也匪將軍之不能兮  
惜不幸而逢此時也死有重於泰山兮繫生民之休戚吾獨  
悲夫將軍兮仰玄穹而太息

弔岳將軍賦

木之顛兮其根必傷人之將死兮俞扁以為不祥嗚呼將軍  
夫何為哉天地易位兮江河倒流鳳凰夭殛兮豺狼冕旒臣  
不知有其君兮子不知其有父嗚呼將軍兮獨銜冤而懷苦



讎何愛而可親兮忠何辜而可戮父兄且猶不顧兮何忠良  
之能育臣竭心以為主兮又何可以為仇也天之所廢不可  
植兮亦將軍之尤也烏傷兮而欲殞兮群啞啞而拊翼猿狖  
縻于機檻兮羈悲鳴而不食相伊人之有心兮曾鳥獸之不  
如忘戴天之耻兮安峻宇而高居信讒邪之矯枉兮委九  
廟于狐狸其卑辭以臣妾兮苟殘喘以娛嬉焚舟楫于洪流  
兮烹驛騶于中路庸夫亦知其至愚兮羗獨迷而弗寤捐薄  
軀以報主兮乃忠臣之素心縱狂瞽之弗思兮又何必以之  
為禽屈原貞而見逐兮伍子忠而獲戾固將軍之不辰兮哀  
中原之蕪穢弔孤墳于湖濱兮見思陵之牛羊寄遙情于悲

歌兮識忘親之不減

弔秦不華元帥賦

世有作忠以致怨兮曾不知其故然懷先生之耿介兮遭時  
命之可憐上壅蔽而不昭兮下貪婪而不貞權不能以自制  
兮謀不能以獨成進欲陳而無階兮退欲往而無路忠沉沉  
而不白兮心搖搖而不固繫乘黃服鼓車兮驟蹇驢以曳之  
胥猛虎于籠檻兮狐狸群而制之衆刻木之枉直兮信讒邪  
之流言倒裳以為衣兮涅素以為玄前宕冥令指途兮驅離  
婁使從之教養由以彎弧兮繫其肘而引之吁嗟先生兮何  
逢時之不辰生不能遂其心兮死又抑而不伸姦何為而可



長兮忠何為而可充尸比干而獎惡來兮白日為之昧幽重  
曰嗚呼哀哉吾安歸乎猥猥升堂兮騶虞以為妖殪鳳凰而  
斲麒麟兮糜梁肉以養鳥吠狗遭烹兮捕猫蒙醢雄鷄晨鳴  
兮衆以為罪忠固不求人知兮於先生其何傷國有忠而不  
知兮喟皇天之不祥辭曰莽莽崇丘闕無人兮天高聽遐疏  
不得親兮松栢摧折荆棘長兮軒于葦施充佩纒兮浮雲虹  
蜺紛縱橫兮上下阻隔幽不能明兮嗟苦先生卒罹殃兮姦  
邪矯枉歸罪愆兮咎繇不作誰與平兮跖犬噬堯理則然兮麒  
麟豺狼不同群兮自古有之吾又何嗟兮

伐寄生賦并序

余山居樹群木嘉果駢植人事錯迕斤斧不修野鳥棲息  
糞其上茁異類日夕滋長舊本就悴余覩而悲之乃募趨  
捷腰斧鑿升其巔剡條剔根聚其遺而燔之於是老榦挺  
立新莖濯如若瘡瘍脫身大姦去國斧鉞之時用大矣哉  
作伐寄生賦

天生五材兮資土而成汝獨何為兮附麗以生疣贅蛭嘍兮  
枝牽蔓縈瘠人以肥已兮偷以長榮狀似小人之竊據兮謂  
城社之可憑觀其陰不庇物材匪中器華不羞于几筵實不  
諧於五味來鳥鳥之喙聒集虫豸以刺耗果被之而實萎卉  
蒙之而本悴壇杏無所容其芬芳其崇曷能成其蔽蒂豈無



庸而有害矧睚睫之可置爾乃建脩竿升木末運斤生風以  
翦以伐脫纏牽於喬竦落纖蕪之騷屑剗蘚膚以除根數去  
毒而刮骨於是巨蠹既夷新萸載蕃迎春而碧葉雲滄望秋  
而碩果星繁信知斧鉞之神用寧能裕蠱以生患也耶嗟夫  
農植嘉穀惡草是芟物猶如此人何以堪獨不聞夫三桓競  
爽魯君如寄田氏厚施姜陳易位大賈入秦桓賢以亡園謀  
既售芊化為黃蠹憑木以槁木姦憑國以盜國鬼居育而人  
殞梟寄巢而毋食堅冰戒乎履霜羸豕防其躅躑諒前轍之  
昭昭何人心之自惑故曰非其種者鋤而去之信斯言之可  
則

通天臺賦并序

昔漢武帝元封二年作通天臺于雲陽亦一時之奇觀  
也相如已死無能賦者乃擬而為之其辭曰

惟漢五世握乾統坤三十有二載文教赫乎有截威武振乎  
八裔於是乎萬方來同四夷嚮風靡民不寧無神不宗天子  
乃駕六龍乘輕雷訪王子于緱山邀安期於東萊泰山封兮  
碣石開宣防塞兮萬福來乃立通天之臺臺延列仙于太虛  
運巧思于孫卿發脫卒于溫舒景雍土之高明得軒轅之闡  
丘後六丁以孱功鑿坤輿以承趺下刻峭以削成兮上辨華  
而紛敷屹屹兮似不周之天柱挺挺兮若閭風之瑤圃矗鴻



濛以建標兮拖甘泉以為祛日月縈繞於中央兮雷霆鬱律  
而在下俯太微之連珠兮見華嶽其如馬雲霧起于太空兮  
激倒景而成虹攀帝車而陟三階兮平步閣道而入紫宮建  
畢昴以為梁兮繚銀河以為帶覽九州于一目兮游氛却而  
清氣會爾乃命方士集玉童脯文鱗炙輕鴻揚太一之靈旗  
撞碧玉之華鍾萬舞波動百神景從奏承雲兮發咸池獻三  
嬪兮矯兩龍合六律兮齊八佾美要妙兮靈感通樂具九奏  
神交五精紅光下垂燁如流星歛霍揮忽電掣而焱集兮皓  
皜瞭晶天輝而日晶方象載之樛流兮伏燭陰以承衡蜚陳  
寶使先驅兮曳旄頭以為旌織阿舒徐而按節兮飛廉游揚

而不驚於是萬姓盱盱使者肅肅竿籟戢音鳥獸跼伏風攢  
縱以扶輪兮雲霏霏而蒙轂爾乃鏗蒲牢舉神燿聲砰隱于  
穹窿兮燎烟煜以燭漢於是乘輿乃升竹宮展嚴禋老聃相  
禮后夔正倫張九光之華鐙列羽葆以行陳登降有數拜起  
有秩八神雍穆而順序千官端儼其如一精誠交乎上下不  
二祀事既虔天瑞乃至泰山宵呼白雲晝媚露落仙掌芝生  
洞房灑銅盤以如飴擢九莖而夜光蓬萊致如瓜之棗玄洲  
獻不死之香神筴周而復始與天地同久長於是天子乃冕  
然而思湛然而疑曰予否德曷致休徵將天以民為子而王  
者代天以理苟能以天心為心天胡為而不喜往者南征北



詩意集卷九  
九  
英  
伐東狩西巡雖曰順天以行道能不連衆而勞民迺命謁者  
省四方賑貧窮察饑荒寒者與之衣餒者周其糧六宮罷文  
繡之飾上林閑射獵之場老羸無負戴之勞幼穉絕夭殍之  
傷亘天所覆莫不熙熙皞皞戴帝德於虞唐也遂作頌曰  
於玉臺兮赫通天不日成之黔走先標綿綿兮稊上玄太一  
貺兮輝光負拜竹宮兮熙恪虔蕃祉衍兮德澤宣人神和兮  
皇億年

龍虎臺賦至順癸酉會試作

龍虎臺去京師相遠百里在居庸關之南右接太行之東  
地勢高平如臺背山而面水每歲車駕行幸上都往還駐

蹕之地以其有龍盤虎踞之形故名耳

猗歟太行之山呀雲豁霧物結元氣而左蟠於赫龍虎之臺摩  
乾輒坤魁群山而獨尊其背崔嵬突律森罔巒而拱衛其勢  
則昆嶠駁駭仰星辰之可捫白虎敦圉而踞峙蒼龍蜿蜒而  
屈盤狀昂首以奮角恍颺興而雲屯其北望則居庸巖嶂烟  
光翠結攢峰列戟斷崖立鐵跋鳥飛而不度古木樛以相掣  
其下視則漲海沖融飛波洗空風帆浪舶往來莫窮想瀛洲  
之密迤睇三山之可通彼呼雁戲馬適足彰其陋而眺蟾望  
屋曷足逞其雄豈若茲臺之不事乎版築而靡一作靡勞乎土功  
也想其欽岑碣磈曼衍迤邐形高勢平背山而面水巨靈獻其



幽秘歸邪護其光畧何嵩華之足吞豈岱宗之可擬此所以  
通光道于上都揭神京之外壘匪松喬之敢登羗乘輿之攸  
止也至若四黃既駕鹵簿既齊方玉車之萬乘蔚翠華之萋  
萋載雲罕與九游光彩絢乎虹霓山祇執警以廣道屏號洒  
雨以清埃朝發軔于清都夕駐蹕於斯臺明四日以遐覽沛  
仁澤於九垓眇軒轅之梁甫屑神禹之會稽雄千古之盛典  
又何數乎方壺與蓬萊慨愚生之多幸際希世之聖明雖未  
獲覩斯臺之壯觀敢不慕乎頌聲遂作頌曰

傑彼神臺在京之郊金城內阻靈關外包上倚天猊下鎮地  
軸大行為臂滄海為腹崇臺峨峨虎以踞之群山巖崑龍以  
翼之於鑠帝德與臺無窮於隆神臺與天斯同崇臺有偉鸞  
駕爰止天子萬年以介遐祉

騷

九嘆九首

秋風起兮夕露溥浮雲沉陰兮白日晝寒禾葉落兮水泉乾  
孤鴈鳴兮悽以酸攬余轡兮悵盤桓野蕭條兮行路難豺狼  
驕兮狐兔頑蘭蕙死兮荆棘蕃我欲奮飛兮無羽翰援雅琴  
兮發哀彈絃斷絕兮涕汎瀾

我髮種種兮颯如其稀我心悵悵兮忽若有遺過吾不能改  
兮德吾不能知往者不可悔兮來者不可期進無益于世兮







履霜思裘兮燠則棄之臨河號舟兮濟而置之不網胡魚兮  
不弋胡鵠翦雞杞梓兮索灌莽以取木捕猶乳鼠兮僉以為  
仁吠狗宵警兮行者怒瞋彈鸞養梟兮莫知其咎斲冰以承  
宮兮曷云能久長太息兮有所思林木動兮巢鳥悲山有窟  
兮園有葵心懷君兮君不知

秋天沈滲兮百草黃螻蛄悲吟兮朝榮有芳屣履起兮獨彷徨  
心悠悠兮懷故鄉原有粟兮隰有禾桂花紅兮蘭紫芽涼  
風動兮松栢馨流潦落兮水泉清疏可茹兮秫可酒集鄉里  
兮會親友坐白石兮蔭蒼筠說明月兮思古人魚鼈淵兮狐  
首丘終余生兮安所求

秋日慘淡

秋日慘淡兮秋風其颺白露既下兮繁霜繼之葉離其根兮  
葉脫其枝丰者黝顏兮柔者就萎登高望遠兮涕泗滂沱松  
栢稀少兮蒲柳何多露不盈條兮霜晨以晡歲晏玄冰兮知  
將奈何

思歸引

山高高兮可以望四荒胡躋爾顛兮而不見我故鄉歲云莫  
兮無衣裳車罷馬羸兮僕夫頓僵水有蛟鰐兮陸有虎狼于  
嗟奈何兮惟懷永傷

松筠軒歌



詩意伯文集 卷九 十三  
彼松之高兮矯吾以其操兮此竹之節兮耿吾以其潔兮露  
溥溥兮宵明煙霏霏兮曉清風聲我琴兮鳴鶴我笙溜胡為  
兮我衣塵胡為兮我纓颺兮颺兮窈以幽驂青鸞兮服蒼虬  
吾與元氣兮升降與雲霞兮綢繆逍遙兮相羊終吾生兮樂  
以忘憂

漁父歌

江之水兮悠悠深有鰻鯉兮淺有鯊與鯪檜為楫兮松為舟  
其釣伊緡兮人誰女尤江之水兮娟娟蒹葭吟風兮楊柳含  
烟有鮪在宥兮有魴在淵其釣伊絲兮人誰女愆江之水兮  
浪浪泳之沄沄兮浮之洋洋有魚與鰕兮可釣以網無遐尔

思兮人誰女傷

麥舟圖歌

我馬飽粟兮彼食不選秣糠我麥滿舟兮彼無以送其死亡  
我忽見兮哀不能忘推以與之兮我心乃康我聞在昔兮有  
虞夏商一夫百畝兮家有稻與梁生不餓殍兮死有藏嗚呼  
今不得見兮使我心傷

山陰王景回友樵齋辭

稻梁離離兮稂莠騶騶不可以偶狼兮鳳不可以侶梟求  
羊無人兮鍾子寂寥哀風鬻發兮原野蕭條四顧彷徨兮憂  
心且焦若有人兮在山椒携糧負薪兮嘯歌以遨黜陟無聞



詩意伯文集 卷九  
方寵辱不搖嗚呼吾爾群兮去無待子招臨流泉兮倚逍遙  
無斤我松兮無使栢也周

柳橋漁唱二首為黃中立作

春風淡淡兮湖水波柳乘橋兮青煙滿莎扣予舷兮發長歌  
靡白蘋兮亂駕鵝前有蛟兮後有鼉予往予還兮予奈何  
彼湖有波兮此橋有柳我維我舟兮聊以搔我首放歌逍遙  
兮哀莫予偶有籜在罾兮有沙在罾逝者滔滔兮羗不可以  
久綠蘋兮菲菲落花兮點衣江無津兮海無涯嗚呼寂寥兮  
吾誰與歸

獲麟操

有獸維麟兮獵者獲之折肢毀膚兮曾不如鹿與麋嗚呼哀  
哉兮爾何生于此時周公已矣兮吾能不悲

在陳操

彼山有楊兮彼隰有柳彼路斯何兮孔棘且阻玄雲杳冥兮  
不日以雨重華寂寥兮誰與晤語茫茫九州兮孰為予所龜  
蒙無人兮駕予歸處

白雲歌為良二人作

用貞上人以白雲隱居名其舍蓋取諸唐狄公之言以寓  
其思親之意括蒼劉基為之歌曰

青山兮翠微白雲兮孤飛悵遊子兮遠于離不如雲兮倏往



而歸白雲兮容與青山兮欲雨懷予親兮在雲之下雲兮雲兮歸予從女

秋山圖歌

秋風起兮蕭蕭望青山兮寂寥水泠泠兮出石葉槭槭兮絳  
條氣悽悽兮就寒夜耿耿兮不朝鳳凰兮安之梧桐兮早凋  
思美人兮隔江河玄雲冥兮天路遙託宵夢兮遠徂征歎扶  
桑兮倚逍遙盼青鸞兮不來愴怳恨兮魂屢飄願乘風兮絕  
浮雲要洪崖兮訪子喬高無梯兮深無航鼉鼉陸梁兮虎豹  
驕歸來兮歸來紫芝有萸兮黃精有苗

梁孝子廬墓詞并序

梁君天民思其父母而廬于墓將終身焉夫廬墓非古禮也然人子之情有不能已而自我為之君子不非焉或乃狀其景物而詠歌之則悖於禮而非孝子之本心矣故為之作楚語使梁君聞之必愀然悲曰他人有心予忖度之夫子之謂也不其庶乎其詞曰

陟彼岵兮望父陟彼屺兮望母若儀容兮在前恍音聲兮在後陟彼屺兮望母陟彼岵兮望父愴怳惘兮無聞心搖搖兮愁苦聞空廬兮山之巔朝松有嵐兮暮蘿有烟其下維地兮其上維天食思寢思兮以日以年嗚呼魂乎其有知兮矢相從於九泉



送龍門子入仙華山辭并序

龍門先生既辭辟命將去入仙華山為道士而達官有邀止之者予弱冠嬰疾習懶不能事嘗愛老氏清淨亦欲作道士未遂聞先生之言則大喜因歌以速其行先生行吾亦從此往矣他日道成為列仙無相忘也其辭曰

青山崔嵬兮烟雲杳冥  
回溪鬱紆兮巖谷晦明  
脩篁雜樹兮相蔽虧洞壑窈窕兮人不知  
清猿警夜兮鶴報晨  
花開鳥啼兮長如春  
陽有芷兮陵有茗  
美人不來兮山寂寥  
瓊芝兮玉華丹  
萸兮翠葩  
紫萼兮黃精  
礪礪兮鬚髮  
蜚梁連蜷兮登降  
列施幽溲  
閔礪兮啟晁  
譎詭芳蘭桂椒兮  
或紅或紫  
松風澗

泉兮金石盈耳  
梧桐萋萋兮竹實  
蕪蕪兮鳳凰翔鳴兮五色卉  
煒望美人兮翠微  
空山寂寥兮遲爾來歸  
霓為衣兮霞為裳  
飲沆瀣兮食瑤漿  
晞正陽兮澡淪陰  
精神完兮毛髮香  
握六符兮躡九靈  
被喬雲兮歌洞章  
御扶搖兮欵天門  
詣北斗兮覲虛皇  
超鴻濛兮軼希夷  
造無始兮逍遙娛  
召秦女兮吹簫  
使湘娥兮彈絲  
洪崖嘯歌兮王母啓齒  
萬舞齊進兮襟佩颯  
纒長離前驅兮鸞鳥為使  
蒼龍駢駢兮白虎豸豸  
雷公磅礪兮列缺旭旭  
登明堂兮絕河津  
上閣道兮攀勾陳  
過三危兮繞玄冥  
出太微兮入西清  
憇牛渚兮泛靈槎  
乘回飈兮以還家  
美人兮歸來山中兮其樂無涯



王彥中哀辭

王氏二子者故宋給事中信之世孫也長曰鍾字彥中  
次曰錡字彥和是同母一乳而生二子焉及長俱好學能  
文詞至正癸巳其長以春秋經魁鄉貢次榜行省銓授建  
德路學錄未幾以力學得疾至丁酉四月卒鄉人咸痛惜  
之蓋期其成而不意止于斯也其弟悲哭不能自勝於是  
元帥石末公聞之為詩以弔且言而劉基為文以哀之其

辭曰

朝出兮鴈行暮歸兮相將聯綵服兮上高堂棣華茂兮親樂  
康忽秋霜兮夏零淒風發兮凋紫荊同氣兩身兮一死一生

車隻其輪兮嗟何以行窈窕兮悵悵想形容兮不可尋歎泣  
兮吞聲恐慈親兮傷心俯重泉兮永隔掩此哀兮何極盡禮  
事生兮恪恭子職是謂孝友兮死者瞑目

太師誠意伯劉文成公集卷之九終



太師誠意伯劉文成公集卷之十

巡按直隸監察御史縉雲後學樊獻科編次

古樂府

艾如張

有苑者林衆鳥萃之我欲張羅榛桔翳之既礪我斧又飭我徒孰是奧穢而不剪除爰升于虛以相乃麓有條我綱載秩我目有鳥有鳥五采其章離離喈喈率彼高岡張之弗獲憂心且傷寤寐懷思曷云能忘有鳥五采亦既來止昭其德音以相君子君子豈弟其儀是若艾而張矣云胡不樂

芳樹



蔚彼芳樹生于蘭池景風晝拂榮泉夜滋燁如其光炫于朱  
曦含華吐芬嚶鳴滿枝君子有酒以邀以嬉羽觴交橫吹竹  
彈絲相彼草木允惟厥時良辰易徂能不懷思沛其邁矣其  
誰女悲

上陵

零雨霏霏亦降于桑愴懷中懷念昔先皇惟昔先皇創業孔  
艱寤寐興懷能不永歎精靈安所體魄焉依幽明隔絕曷已  
其思堂堂梓宮在彼高岡霜露是萃能不慨傷禮起由情將  
情繫物溥斯索矣庶其罔闕郊社既虔宗廟孔威上陵是申  
式昭孝思

將進酒

有酒湛湛亦盈于觴酌言進之思心洋洋亦有兄弟在天一  
方安得致之樂以徜徉有酒在尊既旨且清何以酌之有觥  
其觥豈不欲飲惜無友生愴懷傷懷曷云其平兄弟之合如  
墳如篋朋友既比如網如維死喪急難是責是庇今日有酒  
如何勿思人亦有言解憂惟酒載惓載歎亦孔之咎我觴維  
瓊我竿維玖以樂兄弟以宴朋友

上之回

上之回六龍矯捷光耀拂鷺鳥輜石闕匝崇黎揚靈旗縣月  
支天馬來宛居剡穆上玄釐穰穰坐明堂朝萬方翕披離玉



燭光於億年樂未央

朱鷺

朱鷺來玉山巔  
翫翁引燦臆  
延朱鷺來  
輒流輟飲赤水食丹  
砂朱鷺來  
炎德加威  
昆明滇楚訛  
朱鷺來  
集太液帝錫祐荒  
廣斥朱鷺來  
輝煌煌  
披鷓鴣媒鳳凰  
朱鷺來  
皇之輝神筭演  
無窮期

巫山高

巫山高哉鬱崔嵬  
下有江漢浮天回  
深林日月照不到  
洞谷闐闐生風雷  
危峯半出赤道上  
落日猿狖鳴聲哀  
虎牙赤甲闐雄壯  
風氣以之而隔閼  
楚王遺跡安在哉  
但見麋鹿跳蒿

兼當時忠臣放澤畔  
乃與斬尚相徘徊  
山中妖狐老不死  
化作婦女蓮花腮  
潛形譎跡託夢寐  
變幻涕洟成瓊瑰  
神靈震怒不可禱  
雲霧慘淡昏陽臺  
猛風吹雨洗不盡  
假手秦炬歛飛灰  
精誠感應各以類  
世間妖孽匪自來  
君不見商王夢中  
得良弼  
傅巖之美  
今安匹  
巫山何事近楚宮  
終古怨恨流無窮

戰城南

朝戰城南門  
暮戰城北郭  
殺氣高衝白  
日昏劍光直射旄頭  
落聖人以五服  
限夷夏射獵耕織各自安  
土風胡為彼狂不自  
碩而與大國爭長  
雄高帝定天下遺此平城憂  
陛下宵旰



不遑食擁旄仗鉞臣不羞登南城望北上雲茫茫土膺膺蚩  
尤禡牙雷擊鼓舉長戟揮天狼休屠日逐渾邪王羶車尾尾  
連馬羊橐駝載金人照耀紅日光逍遙而來歸帝鄉歸帝鄉  
樂熙熙際天所覆罔不來小臣獻凱未央殿陛下垂拱安無  
為

君馬黃

君馬黃我馬驪二馬八足爭驅馳回頭顧影雙驕嘶尾端散  
作赭虹飛黃馬耀日黃金晶驪馬謂是玄天精眼前好醜那  
能明吾聞良驥稱以德不聞矜此驪黃色世無伯樂識者誰  
有德無色空自知

思悲翁

弱齡輕日月邁景想神仙顧往諒無及待來徒自憐黃金棄  
砂礫劬心鍊丹鉛鑿石不得水沉劍徒窺淵流光不我與白  
髮盈華顛杖策出門去十步九不前歸來對妻子塵窟午未  
煙干時乏計策退耕無園田霜蒲怨青松逝矢恨驚弦已矣  
復何道吞聲赴黃泉

聖人出

聖人出臨萬方赤若白日登扶桑陰靈韜精星滅芒群氛辟  
易歸大荒晻曖寒谷熙春陽枯根發茁暢幽藏潛魚躍波谷  
鳥翔花明草暖青天長青天長聖人壽北斗軒轅調氣候北



辰中居環列宿八風應律九歌奏圓方交格神靈輓聖人出  
陽道開億萬年歌康哉

釣竿

斫竹作釣竿抽蠶作釣絲滄洲日暖波漣漪綠蒲茸茸柳葉  
垂鈎織餌香魚不知石鱗激水溪毛動玉燕迴翔竿尾重大  
魚入饌腮頰紅小魚却放淵法中更祝小魚知我意長逝深  
潭莫貪餌

思美人

雨欲來風蕭蕭披桂枝拂陵茗繁英墮鮮葉飄揚煙埃靡招  
搖激房帷發綺綃中髮膚惜寂寥思美人隔青霄水渺茫山

岩嵒雲中鳥何脩脩欲寄書天路遙東逝川不可邀芳蘭花  
日夜凋掩瑤琴閑玉簫竟衆心搖搖望明月歌且謠聊道  
遙永今宵

關山月

關山月明風惻惻萬里黃雲雜沙磧夜深羗笛吹一聲征人  
相看淚沾臆古人以綏服奮武衛耕戰守禦不外求何人倡  
此戎邊策千載以貽中國憂關山月圓復缺何忍年年照離  
別願得馳光照明主莫遣邊人望鄉苦

楚妃歎

江漢揚波六千里上有巫山矗天起錦衾一夕夢行雲萬戶



和門冷如水聞道秦兵下武關君王留連猶未還山深不見  
章臺殿汨羅冤浹空潺湲尚憶前王好馳逐宮中美人不食  
肉回狂作哲須臾間至今相業歸孫叔楚宮無復如昔人况  
有神女如花新悲來恨新還憶故誰能斷却巫山路

上清詞三首

王子晉好吹笙吹得神仙下玉京一朝羽化隨風去回首故  
宮芳草生

天上月影悠悠似鏡看看又似鈎自是嫦娥甘寂寞桂華相  
對度千秋

河漢水九秋清涼月滿空聞鴈聲鴈聲不到夢先到白露濕

衣天未明

漢宮曲

小雨如烟畫掩扉捲簾忽見燕雙飛不知春色能多少總向  
昭陽柳上歸

江上曲八首

數樹垂楊綠水邊問郎何不繫蘭舡浦沙新漲青山遠半夜  
月明無杜鵑

曾記樓船夜泊時家家絃管闌腰肢于今絃管歸何處縮束  
枯蒲當酒旗

昨夜月明天似水今晨月落水如天天長水遠人何處蘆葦



蕭蕭一抹烟

紫桂香銷五夜霜。碧雲收盡玉蟾光。琅玕不是人間樹。何處朝陽有鳳凰。

月出前山青黛寒。鴈聲遙下碧雲端。草根錯認驪珠吐。自是西風白露團。

賓鴈來時月滿洲。于今鴈去月如鉤。鴈來鴈去何時了。月照離人又白頭。

憶見垂楊縋綠絲。陡看秋菊映踈籬。柳花作絮隨風去。菊綻金葩欲似誰。

紅蓼丹楓一色秋。楚雲吳水共悠悠。人間萬事西風過。惟有

滄江日夜流

寒夜謠二首

良夜悠悠星河滿。天風吹窓櫺聲如管絃。無酒可飲寒不能眠。枯腸飢鳴百慮交。煎人生一世。不滿百年。寤寐懷思曷維其然。內省不疚。有愧聖賢。

今夕何夕。歲聿其徂。草木凋落。山川縈紆。瞻彼鴻鴈。拂翼天衢。離離和鳴。載悠載徐。雖無羽翰。心與之俱。華月出雲。青鐙在隅。歌以寫懷。云何其吁。

夜夜曲

冬夜恒苦長。夏夜恒苦短。短長相救。虧殷動望。推挽。紉茅作



繩繩易斷汲水作池池易旱故鏡塵昏難遠照故衣絮故無  
新暖西風嫋嫋吹桂枝白露點苔黃葉滿

秋夜曲

木落霜露繁鳥啼夜方永起行望明月西風吹鴈影鴈飛一  
何急烏啼安所集徘徊不能寐望月空佇立佇立河漢傾誰  
家砧杵聲閉山渺千里何處不傷情

長歌續短歌

短歌調促情苦悲長歌引愁無絕期短聲欲盡長聲續似是  
荆山人泣玉悲哉荆山泣玉人但知貴玉不肯身縱令哭盡  
歌堪聽何異春花委路塵古稱悲歌可當哭傷心如中金石

鏃更不必聽蔡琰笳又何必聽漸離筑長歌飄揚徹九天短  
歌嗚咽入九泉徒言歌哭兩情異誰知歌聲尤可憐

墻頭花

墻頭花紅錦妬美人抱瑟倚高樓只恐花飛逐風去熒熒絳  
蠟送殘宵燕語鶯啼斜日暮

望行人

朝聽乾鵲鳴暮見燈花結鵲鳴燈結無定期鏡裏青雲看成  
雪人生百歲難長保天上孤鸞海中老滔滔逝水不回西灼  
灼秋花幾時好一朝復一朝一夕復一夕只恐君心念妾時  
妾身已作山頭石



長松梢

長松梢青拂天歲暮商飈急寒苦令人憐陰崖有樸檄生在  
荆棘下霜凋荆棘葉網綴如簷瓦春風破冰凍勁綠不曾赭  
禍福相倚伏豈不在所招寧為樸檄莖莫作長松梢

折楊柳

東風二月春如酒不見百花惟見柳柳絲縮烟留暝鴉柳花  
蕩漾迷羲和美人捲簾看不足柳色萋萋妬娥綠夜來微雨  
清郊圻鶯黃相應鳴墳篋欲寄柔條無信使空將淚染回文  
字

王子喬

王子喬乃是髭王之子皇王之孫深宮洞房不稱意却駕白  
鶴尋軒轅虹蜺為旂雲為旛飄然乘風上崑崙王子喬去何  
之朝發陽谷暮崦嵫六龍九鳳相追隨穆王西上不得王母  
訣胡為元氣獨爾私王子喬去不還后稷功業委如山猶有  
九鼎知神姦王城日夕生茹菴爾獨胡為白雲間王子喬空  
長歎

走馬引

天冥冥雲濛濛當天白日中貫虹壯士拔劍出門去手提仇  
頭擲草中擲草中血漉漉追兵夜至深谷伏精誠感天天心  
哀太一乃遣天馬從天來揮霍雷電揚風埃壯士呼天馬馳



橫行白晝更不敢窺戴天之耻自古有必報天地亦與相扶  
持夫差徒能不忘而報越棲於會稽又縱之始知壯士獨無  
媿魯莊稽紹何以為人為

結交行

朋友以義合父要貴不忘結交或匪人騶虞化為狼君不見  
市井人盃酒忽相得傾肝瀉膽無所惜一朝需求不稱意口  
裏驅蠱心上蚝更聞背語觸疑心墻角車輪亦生翅君不見  
耳與餘又不見田與竇當其得意時刎頸以相就寧知嫌隙  
反掌成坐令衽席生戈兵古人重結交晏子真其人伍文執  
誼羊豕之合死生棄置安足陳

梁甫吟

誰謂秋月明蔽之不必一尺霧誰謂江水清滄之不必一斗  
泥人情旦暮有翻覆平地倏忽成山谿君不見桓公相仲父  
豎刁終亂齊秦穆信逢孫遂違百里奚赤符天子明見萬里  
外乃以蕙苴為文犀停婚仆碑何震怒青天白日生虹蜺明  
良際會有如此而况童角不辨粟與稊外間皇父中豔妻馬  
角突兀連牝鷄以聰為聾狂作聖顛倒衣裳行蒺藜屈原懷  
沙子胥棄臙魅叫嘯風淒淒梁甫吟悲以悽岐山竹實日稀  
少鳳皇憔悴將安棲

春日行



白日出東陸，垂光曜中天。大哉至陽德，蕩蕩無頗偏。坐令慘  
烈化滋潤，頃刻枯槁回。鮮妍聖人法，天道神化參。玄微春朝  
著典禮，上下同光暉。垂衣向明物，自育帝力皞。皞無人知春  
天和春日麗，但願宇宙長如春。聖明天子千萬歲。

墻上難為趨行

弱水不可以航，石林不可以車。人生貴守分，墻上難為趨。茫  
茫八極內，狹徑交通衢。紛紛皆轍迹，擾擾論錙銖。焦原詫齊踵，  
龍領夸探珠。片言取卿相，盃酒興剪屠。機事一朝露，妻子化  
為魚。林間有一士，蓬蒿翳窮廬。種稻十數畝，種桑八九株。有  
酒且飲之，無事即安居。孰知五鼎食，聊保百年軀。悠悠身後  
事，汲汲復何如。

少年行

駿馬狐白裘，玉勒黃金羈。賓從如浮雲，顧盼生光輝。朝驅紫  
陌塵，暮醉青樓姬。但見花月好，寧知霜雪飛。荏苒世途異，淒  
涼瑤草衰。園田皆易主，親友盡睽違。學書時既晚，躬稼力已  
微。歲晏寒風生，倚墻聽隣機。逝水不可挽，枯蓬安所依。佇立  
為爾歎，感我淚沾衣。

獨漉篇

獨漉復獨漉，月明江水濁。水濁迷龍魚，月明復何如。楚國皆  
濁，屈原獨清。行吟澤畔，哀哉不平。上山采茶，下山采藥。心在



腹中何由可白。豺狼在後，虎豹在前，四顧無人，魂飛上天。珠玉委棄，不如泥沙。躡冠戴履，萬古悲嗟。

懊懷歌

白鷗養雛時，夜夜啼達曙。如何羽翼成，各自東西去。昨夜霜風起，入戶復吹帷。兒啼母心酸，母愁兒不知。養兒圖養老，無兒生煩惱。臨老不見兒，不如無兒好。食蘩苦在口，食蓮苦在心。苦心無人知，苦口浹沾襟。男兒初生時，蓬矢桑弧弓。老大却思家，懊惱無終窮。

王昭君

漢庭不賞徵功士，昭君却向胡中死。昭君辭漢入胡中，胡女悲愁漢嬪喜。含情欲怨當語誰，手彈琵琶淚沾衣。掖庭望幸從此絕，巫山有路他生歸。殷勤說與上林馬，好在明年再相見。漢恩如海長自深，妾自生來命如綫。賤妾一身何足惜，可惜當年劉敬策。遂令上策重和親，欲倚紅顏清塞塵。只恐妾身先草露，漢宮無復如花人。

塘上行

塘上何所有，有蒲與荷花。蒲花難開，荷易落。使我歎恨長咨。嗟鴛鴦戲我後，鷓鴣翔我前。四顧不見人，淚下如流泉。浮萍違淥井，寄身滄江渚。滄江不應竭，是妾命如許。朝淚灑玉臺，夕淚沾羅衾。采荷得見蓮，中復懷苦心。廣進列肴蔬，好者即



美味茶蓼有時甘，菘葵有時棄。嚴風吹秋林，蕙蘭化為草。菘  
悒今可憎，芳菲故嘗好。行亦私自憐，坐亦私自憐。願為天邊  
月，流影玉堦前。

君子有所思

晨上龍首山，徘徊望咸京。交衢錯萬井，甲第連公卿。鞍馬相  
照耀，冠蓋如雲行。扈從金宮歸，賜酒銀甕盈。前庭列駟騎，後  
苑羅傾城。寵極妬心起，歡餘驕氣生。田寶巧相奪，蕭韓互摧  
傾。快意在一時，報復延戈兵。范睢掉柔舌，穰侯去疆嬴。寧知  
幽燕客，接踵夸雄鳴。茫茫前車轍，遺跡猶未平。胡為不自悟，  
坐使憂患并。二疏獨何人，千載垂令名。

上山采蘼蕪

上山采蘼蕪，山岐路迢遞。下山逢故夫，悲風生羅袂。憶昔結  
髮時，願得終百年。變故不可期，中道相棄捐。蓮實生水中，石  
榴生路側。未嘗掛齒牙，中心豈能識。上山采蘼蕪，羅袖生芳  
菲。因君贈新人，莫遺秋霜霏。落葉辭故枝，不寄別條上。白日  
無回光，誰能不惆悵。

雙桐生空井

雙桐生空井，井空桐葉稀。葉稀不自蔽，鳳鳥將安歸。雙桐生  
空井，井泥泉不出。桐根日夜枯，何由伐琴瑟。

美女篇



南國有美女粲粲玉雪顏。眉目豔華，月色映清秋。寒粉黛不敢澆，佩服惟幽蘭。一朝備選擇，得廁金宮班。貞心耻自衒，望幸良獨難。况蒙衆女妬，情咲誰為歡。恒恐芳桂枝，寂寞零露溥。素手發瑤琴，泠泠奏孤鶯。宮商合要妙，遺響風珊珊。大音世罕識，日暮空盤桓。安得託宵夢，集君瑤臺端。相思不可極，躑躅起長歎。

玉階怨

長門燈下淚，滴作玉階苔。年年傍春雨，一上苑牆來。

秋思

梧桐坐碧砌，密葉暗金井。驚心昨夜月，照見棲禽影。

長門怨

白露下玉除，風清月如練。坐看地上螢，飛入昭陽殿。

宛轉歌

星稀月白河闌干，飢蟲額號莎草寒。美人望月歌宛轉，瀟湘水碧蒼梧遠。愁魂一夜不得歸，化作斷雲天際飛。

長相思

長相思，在沅湘。九疑之山鬱蒼蒼，青天蕩蕩林木暗。落日虎嘯風飛揚，欲往從之，水無航。仲尼有德而不用，孟軻竟死於齊梁。松柏摧折桂生蠹，但見荆棘如山長。長相思，斷人腸。

雉子班



雉子班飛脩脩鳴嘯嘯  
踉蹌出沒灌莽中  
衰裳煥爛頽瞳瞭  
野人挂翳潛置媒  
和聲相應無驚猜  
黃間一發激流電  
錦綉披裂委草萊  
林棲野啄本無累  
嗜欲沉溺禍所胎  
君不見天池鳳凰食竹實  
道遠至和永終日

、明月行

朗月何朧朧照我綺牕中  
牕中美人不能寐起看丑字生秋  
風秋風飄飄吹木末  
纖雲卷盡懸明月  
明月隨風出海來  
海水蕩漾龍鱗開  
寒光噴浸碧落外  
白浪湧作金銀臺  
何處悲風怨羌管  
誰家舞榭笙簧暖  
長信宮中漏水長  
昭陽殿裏更籌短  
漏長更短總含情  
開窓坐視河漢傾  
廣寒宮在何處欲

往從之渺煙霧青離汗漫不可期  
桂華如雪東方曉

大牆上蒿行

牆上蒿方春擢秀何芃芃  
炎天六月旱無雨  
枝葉枯死隨飄風  
世情翻覆不可擬  
人生有身莫依倚  
君不見樊將軍一朝  
函首西入秦  
又不見劉越石  
仰天長歌握中璧  
三士自殘因二  
桃子胥終棄  
吳江濤世人見  
機苦不蚤  
何不看取牆上蒿

鷄鳴曲

日將出鷄先鳴  
千門萬戶聽鷄聲  
美人錦帳愁欲曙  
壯士苦心煎百慮  
人間百年能幾日  
日日鷄鳴催日出  
一朝過了復一朝  
白髮蕭蕭此生畢  
齊妃播淑德  
感彼蟲豸  
周宣悟姜



后功業光中興亦知國家共如此莫恠鷄鳴催早起

邯鄲才人嫁為厮養卒婦

邯鄲有才人豔色如朝霞嫁作厮養婦雲鬢埋泥沙憶昔趙王全盛日夜夜綺筵張寶瑟中山美酒盈羽觴一啖黃金滿十鎰繁華過眼如轉蓬故宮禾黍秋茫茫明珠白璧走函谷隆簪遺珥空悲風人生最苦是衰老白首無歸向誰道華門夜永月光寒卧聽鴛鴦駘乾枯草

出塞

居延風高榆葉空狼烟夜照甘泉宮將軍授鉞虎士怒蚩尤  
亘天旗尾紅麒麟前殿催賜酒已覺此身非已有益氣遙將

邊吞壯心肯落嫖姚後鴈門城外沙如雪玉帳霜濃鉄衣  
折長劍須殺瀚海雲哀笳莫怨天邊月北風烈烈刁斗鳴回  
看北斗南方明驚箭離弦車在坂不勒燕然終不返

入塞

狐裘蒙茸沙磧裏望見玉關驚且喜閉門候吏記曾逢白髮  
相看淚如水歸來放馬咸陽原舊遊今有幾人存斜陽慘淡  
照籬落閑看鄰翁戲子孫

孤兒行

蓬頭破足誰家兒滿面塵埃雙淚垂爺娘棄我不待老骨肉  
無人但兄嫂兩身一氣不相知陌路茫茫向誰道清晨采薪



日入歸殘羹冷飯難充飢欲言問兄兄不顧嫂是他人更奚  
訴人生一世為弟兄同根自合同枯榮爺娘在日曾眷戀願  
兄回看死人面

病婦行

夫妻結髮期百年何意中路相棄捐小兒未識死別苦啞啞  
向人猶索乳箱中探出黃金珥付與孤兒買餐餌不辭瞑目  
歸黃泥泉下常聞兒夜啼低聲語郎情不了願郎早娶憐兒  
小

淮南王

淮南王好神仙澄心鍊炁守自然收拾真一歸中圓化為五

色黃金丸乘風駕景飛上天飛上天逍遙遊八鸞捧轂龍翼  
輶虹蜺繽紛夾綵旂上窺九陽下六幽回頭大咲武皇帝柏  
梁桂館空清秋

蜀國弦

胡笳拍斷玄冰結湘靈曲終斑竹裂為君更奏蜀國弦一彈  
一聲飛上天蜀國周遭五千里我眉岩岩連玉壘岷嶓出水  
作大江地若天浮戒南紀舒為五色朝霞暉慘為虎豹嗥陰  
霏翕為千嶂雲雨入噓為百里雷霆飛白鹽雪消春水滿谷  
鳥相呼錦城暖邑姬倚歌漢女和楊柳壓橋花纂纂銅梁翠  
氣通青蛉碧鷄啼落日星山都號風寡孤泣杜鵑鳴咽愁



幽冥商悲羽怒聽未了窮猿三聲巫峽曉瞿塘噴浪翻九淵  
倒瀉流泉喧木杪樓頭仲宣新旅客故鄉渺渺皆塵隔含悽  
更聽蜀國音不待天明頭盡白

昔昔鹽

楊柳正萋萋門前碧草齊別離如昨日白髮滿春閨飄花蕪  
淚落行雲逐望迷綠苔凝履跡粉汗浥書題夢到龍沙北  
蒐銷馬邑西卷簾雙燕入開鏡一鸞啼腸共吳江繞眉將楚岫  
低攀枝憐並蒂窺沼妬雙棲濯水寧無劍通天亦有犀那看  
明月夜登樓惑馬蹄

東飛伯勞歌

南飛鷓鴣北飛鵠黃昏鳴鷄白日燭珊瑚石上栽兔絲鴛鴦  
獨宿枯桑枝永夜涼蟾入羅幕蟬翼不如秋髮薄寒塘露蓮  
千葉紅可憐零露空隨風

雙燕離

雙燕營巢時雙飛復雙語輕盈柳陌風振迅芹塘雨巢成近  
繡幃雙宿更雙飛為蒙主人愛不信有暎遠四月溫風起榴  
花發紅葢拾蟲還哺雛出入無停翮五月教雛飛繞巢舞烏  
衣側避蛛絲過斜縈柳線歸六月雛翼老分飛各相保脉脉  
傍珠簾依依集蘭縹世事有轉旋陵谷一朝遷昆明延劫火  
甲第化歌煙帶睡驚飛出風沙兩相失死生不得知嫵婉從



詞意仙文  
卷十  
茲畢回看舊主人粉黛成灰塵天高塵渺渺海闊波鱗鱗在  
苒朝還暮惇惇向何處毛凋半夜霜淚滴三春露露寒霜又  
濃憔悴不成容同心諒難隔魂魄終相從

烏棲曲

霜華着樹成秋益樹頭棲烏驚夜起起向幽閨啼數聲閨中  
美人泣到明

吳宮烏啼夜已分宮中不聞人盡聞夜深風落茱萸子沉沉  
漏斷啼烏死

三洲曲

三洲洲上花柳春三洲浦裏多商人酒旗紅袖明江閣客舡

只望洲邊泊

八月風吹洲上樹樓舡却向江西去紅粧送別各沾巾驚動  
新來江北人

武陵深行

武陵溪一何深水有射工射人影陸有丹蛇長百尋嗟哉武  
谿不可臨溪之水深且闊鳥不敢飛龍不敢越海氣連天日  
月昏茵露着人肌肉裂嗚呼夫夫寧能沙場百戰死有骨莫  
葬武谿水

遠如期

遠如期近別尚云可遠期能不悲憶昔辭君出門去手種庭



前松栢樹樹今成器人未歸洞房白髮秋霏霏高原有梧隰  
有櫓待君北邱山石下

大堤曲

大堤女兒顏如花大堤堤上無豪家東家女作西家婦夫能  
棹舡女沽酒春去秋來年復年生歌死哭長相守君不見襄  
陽女兒嫁荊州撞鍾擊鼓烹肥牛樓舡一去無回日紅淚空  
隨江水流

明月子

朱閣綺疏瓊作戶明月照人秋獨苦桂花吹冷眠不成誰家  
高樓絃管聲倚樓空望別離處唯有清光自來去月圓正好  
缺復催人生見月能幾回

短歌行

來日苦短去日苦長日長不自覺日短令人傷君不見望後  
月又不見霜中盡清光縱好魄已虧芳心欲動根先死少年  
不知老可悲衰老却憶少年時

長安道

長安道送盡芳菲到枯槁人生衰盛苦不常何異長安道傷  
草漢家將軍初拜官門前上客車班班一朝世衰烟燄歇車  
輪無聲馬蹄絕明年有詔封冠軍依舊車馬來如雲

隴頭水



隴頭水征夫淚征夫之淚滴隴頭化為水入秦川流水流向秦川嗚咽嗚不已何因得天風吹入君王耳

、秋宵吟

玄蟬催秋入湘簾芙蓉露浴胭脂淡銅烏吻水添夜長碧草歛愁歸寒蠶羅帳無人五更雨梧桐驚啼白楊語春光爛熳不得知霜露淒涼奈何汝

、車遙送

車遙遙馬蛄蛄不知何人始作車長與人間載離別回風吹起羅帳塵低頭恨殺作車人

、陽春歌

帝車東指淑景昭冶容丹再生寒條枯根相顧一時起陽春只在霜雪裏枝頭候禽鳴滑滑暖烟日夜催花發蜂喧蝶競方及時風雨宿昔成離披人間但見陽春好未識春陽有枯槁

鳴鴈行

嗷嗷鳴鴈鳴達旦舉翼相連拂雲漢平原漠漠生野烟鴈飛只向江南天江南十月多禾黍一半輸官半供汝明年二月歸養雛雛成又望江南去

、獨不見

暖烟漾春林色紫膩雨摧紅出花蓋蝶飛撩亂燕飛輕嚶鳴



相應俱有情有人抱瑟上高閣坐對粧臺彈別雀曲終顧影  
還徘徊東風自吹羅帳開

梅花落

種梅長江邊歲晚花始發東風為愛桃與李却使孤芳坐銷  
歇美人高樓深紫霞捲簾一見長嘆嗟世間有榮即有悴君  
不見海中碧樹終無花

折楊柳

去年送君楊柳青暖風晴日花冥冥今日思君瑣窓綠柳條  
又綴黃金粟君心却似條上花隨風飄蕩不思家妾心已作  
料上槁縱得春光為誰好折取長條寄遠人人生四十無青

春。

秋夜月

秋夜月黃金波照人哭照人歌人歌人哭月長好月缺月圓  
人自老

棗下何纂纂行

棗初作花時纂纂臨路岐八月棗成實累累曜朝日棗花纂  
纂蜂蝶翻棗實累累人滿園嚴風蕭瑟枯葉飛蜂蝶不采人  
亦稀

白苧詞二首

鏗華鍾伐靈鼓青娥彈絲白苧舞文竿迎風雉振羽長袖奮



迅若雲舉博山霧合春濛濛玉缸搖火生長虹翠蕩紅翻如  
夢中

暖香結暝嬌青春翠釵珠壓光照人鳳簫十二煙霧勻鴻鷺  
燕嬌波龍鱗玉觴交飛酒如酒門外斜陽在林杪宮中沉沉  
天未曉

、  
蛺蝶行

軟芳晞露春鮮妍上有蛺蝶飛翩翩暖風扶暝撲天起翠重  
紅輕迷欲死東園無花留不住相隨又過西園去沉沉斷夢  
失韓憑却抱霜華怨秋曙

、  
釣天樂

君不見天穆之山二千仞天帝所以觴百靈三嬪不下兩龍  
去九歌九辯歸杳冥我忽乘雲夢輕舉身騎二虹臂六羽指  
揮開明闕帝閔環佩泠泠曳風雨明月照我足倒影搖雲端  
參差紫鸞笙響音震瑤臺寒我欲聽之未敢前空中接引皆神  
仙煙揮霧霍不可測翠葩金葉光相射鯨鍾虎簾鏗鴻濛撼  
昆崙兮殷崆峒揚天桴兮伐河鼓咸池波兮析木風遂升泰  
階朝玉帝側身俯伏當瓊陛訊曰太極拆裂為乾坤紛紛枝  
葉皆同根胡為妄生水火金木土自使激搏相熬煎臣聞三  
皇前群物咸熙熙衆子戴一父皞皞無偏私忽然元氣自蕩  
灑變換白黑分賢癡蚩尤與黃帝從此興戈矛流毒萬萬古



迅若雲舉博山霧合春濛濛玉缸搖火生長虹翠蕩紅翻如  
夢中

暖香結暝嬌青春翠釵珠壓光照人鳳簫十二煙霧勻鴻鷺  
燕嬌波龍鱗玉觴交飛酒如酒門外斜陽在林杪宮中沉沉  
天未曉

蛺蝶行

軟芳晞露春鮮妍上有蛺蝶飛翩翩暖風扶暝撲天起翠重  
紅輕迷欲死東園無花留不住相隨又過西園去沉沉斷夢  
失韓憑却抱霜華怨秋曙

釣天樂

君不見天穆之山二千仞天帝所以觴百靈三嬪不下兩龍  
去九歌九辯歸杳冥我忽乘雲夢輕舉身騎二虹臂六羽指  
揮開明闕帝閔環佩泠泠曳風雨明月照我足倒影搖雲端  
參差紫鸞笙響音震瑤臺寒我欲聽之未敢前空中接引皆神  
仙煙揮霧霍不可測翠葩金葉光相射鯨鍾虎簾鏗鴻濛撼  
昆崙兮殷崆峒揚天桴兮伐河鼓咸池波兮析木風遂升泰  
階朝玉帝側身俯伏當瓊陛訊曰太極拆裂為乾坤紛紛枝  
葉皆同根胡為妄生水火金木土自使激搏相熬煎臣聞三  
皇前群物咸熙熙衆子戴一父皞皞無偏私忽然元氣自蕩  
灑變換白黑分賢癡蚩尤與黃帝從此興戈矛流毒萬萬古



迅若雲舉博山霧合春濛濛玉缸搖火生長虹翠蕩紅翻如  
夢中

暖香結暝嬌青春翠釵珠壓光照人鳳簫十二煙霧勻鴻驚  
燕嬌波龍鱗玉觴交飛酒如酒門外斜陽在林杪宮中沉沉  
天未曉

蝶行

軟芳晞露春鮮妍上有蛺蝶飛翩翩暖風扶暝撲天起翠重  
紅輕迷欲死東園無花留不住相隨又過西園去沉沉斷夢  
失韓憑却抱霜華怨秋曙

鈞天樂

君不見天穆之山二千仞天帝所以觴百靈三嬪不下兩龍  
去九歌九辯歸杳冥我忽乘雲夢輕舉身騎二虹臂六羽指  
揮開明闕帝閔環佩泠泠曳風雨明月照我足倒影搖雲端  
參差紫鸞笙響音震瑤臺寒我欲聽之未敢前空中接引皆神  
仙煙揮霧霍不可測翠葩金葉光相射鯨鍾虎簾鏗鴻濛撼  
昆崙兮殷崆峒揚天桴兮伐河鼓咸池波兮析木風遂升泰  
階朝玉帝側身俯伏當瓊階訊曰太極拆裂為乾坤紛紛枝  
葉皆同根胡為妄生水火金木土自使激搏相熬煎臣聞三  
皇前群物咸熙熙衆子戴一父皞皞無偏私忽然元氣自蕩  
灑變換白黑分賢癡蚩尤與黃帝從此興戈矛流毒萬萬古



爭奪無時休骨肉自殘賊帝心至仁能不憂帝不答臣心迷風  
師咆哮虎豹怒銀漢洶湧天鷄啼颯輪撒揆三島過海水盡  
是青玻璃神奔鬼恠惕驚起遺音泐泐猶在耳夢耶遊耶不  
可知但見愁雲漠漠橫九疑。

周小史

婉嬾周小童冶容敵花紅鮮雲委綠髮明星炯雙瞳采蘭漣  
水湄挾彈長陵東擲果開春市卷衣媯金宮流盼溢華彩言  
咲生芳風常恐秋露零瑤草成衰蓬食桃坐翻覆倩笑徒為  
上繁華豈不好不知身所終吾聞濟川楫乃屬植鱗翁悠悠  
萬世下德業光無窮

結襪子

昔有信陵君乃在大梁城親為貴介弟位冠諸侯卿傾家待  
國士倒屣延豪英詣門謁朱亥虛左上侯羸袖椎奪兵符救  
趙斐英聲河外走蒙騫宗社賴扶傾于今不可見寂寞傷人  
情

拔蒲三首

拔蒲清川渚水淺蒲不長自非排風羽莫羨凌雲翔

拔蒲江水湄終日不盈把嫌殺紫鴛鴦雙戲蒲葉下

拔蒲復拔蒲織作波紋篔無處寄相思秋風露蓮淡

從軍五更轉



一更戍鼓鳴市上斷人聲風吹鴻鴈過憶弟復思兄  
二更月上城照見堦鏊光側身望山川淚落百千行  
三更悲風起樹上烏鵲鳴枕戈不能眠荷戈繞城行  
四更城上寒刁斗鳴不歇披衣出戶視太白光如月  
五更星斗稀霜葉光爛爛健兒爭先起拂拭寶刀看

前有尊酒行

前有尊酒芳以飴舉杯欲飲且置之丈夫有志可帥氣胡為  
受此麴蘖欺禹惡旨酒而玄德上達桀作酒池而南巢是蔡  
商辛惡來以白日為夜糟丘肉林相枕藉瑤臺倏忽成灰塵  
流毒猶且遷殷民夫差醜而納施楚國酣而放屈姑蘇臺上  
麋鹿遊鄆郢宮中狐兔出淮夫罵坐禍延魏其竹林稱賢神  
州羨藜亡家破國有如此酒有何好而嗜之前有尊酒釀以  
清酌之白日成晦冥眼花耳熱亂言語元氣耗斲肝膽傾乃  
知酒是喪身物衛武之戒所以垂休聲

公無渡河

丈夫不愛死成仁心所安殞身苟無故哀哉徒自殘水能殺  
人人共知公獨茫然狂以癡黃河渺渺無津涯乃欲絕流而  
渡之公也溺死人誰悲世路如何險惡實多平地倏忽滔天  
風波利濞欲餌孰知其佗不見不聞縱橫網羅固不必如公  
之癡可堪以魚中之鉞亦不必如公之狂可禽以伏甲之觴



眼前言咲百媚出寧知兵刃羅心腸公無渡河河無津筮篔  
一曲愁殺人

隔谷歌

戰鼓咽悲風弓折不可把弟兄隔谷不相聞咫尺人間與泉  
下丈夫誓許國殺身非所憐兩心本一氣何能坐相捐登埤  
四顧望慨慷肝膽裂不見救兵來但見繞城鐵甲光如雪飛  
禽在羅罔尚或念其飢身為高官馬食粟忍見手足居重圍  
相彼鴻與鴈亦各顧匹儔挽弓射一猿群猿拔箭聲啾啾鳥  
獸且有情人心獨何尤嗚呼田家索荆雖微木不忍聽君歌

隔谷

步虛詞五首

太微啓靈宇紫殿含祥風圓光照無外梵炁來冲融仙人魚  
鱗次羽葆朝當中離羅鬱蕭臺縹緲浮太蒙泰階平六符文  
昌位三公北斗運元化軒轅成歲功稽首玉陛下道遙樂無  
窮

鬱華開赤殿結鄰炫黃文歲蕤爛霄漢照曜下土墳東華暉  
嚴駕西崦洋昏氛神行肅臺臺象化陶醺醺景風調塊北玉  
燭煥烟煜冥茫密勿間歛忽幽朗分萬靈仰無私九真告成  
勲

重陽表寶闕衆星拱高垣寥寥太虛庭巍巍無極尊白帟伏



右駢青龍承左轅玄武後躩踞長離前騰騫黃靈正常居萬  
有歸一元希微眇稊粟浩蕩弥乾坤高卑各奠位神化無窮  
源

步虛歸太一精心覲樞庭浮浮回極運湛湛規中清五神謹  
訶衛六位肅枚寧東溟升陽曜西海生陰靈炎光燿玄室湧  
醴液朱陵駸駸麤穢除綿綿淳粹凝妙用無邊方攝身遊帝  
青

焚香禮玄梵肅駕朝紫宸游雲結華蓋鮮飈翼飛輪披煙上  
閣道佩月攀鈎陳服食丹霞漿嗽嚙甘露津琅琅歌洞章窈  
感虛皇嘖飄飄廣莫風舒爾青林春沆瀣六合外永與無始

麟

氣出唱

今日不樂振策遠遊東上泰山巍何脩脩道逢仙人要我同  
仇蒸霞為糧烹玉為羞玄英素彩光華蔓流日觀菡萏葩華  
九州令我從之身輕若浮道以五鸞翼以兩虬朝翔玄圃夕  
止蓬丘謁見王母雲眉月眸青娥三千或舞或謳風吹琅环  
聲如鳴球雜花並開莫知春秋洪崖先生勸我此留自揣凡  
骨非仙者儔七情交煎一觸百抽又病驚僻無藥可瘳崇崇  
清宮蕩無涯陬列仙如沙不少一漚王母咲聽拜謝扣頭歸  
來山林曷標曷鉤熙熙泰和長樂無憂



班婕妤

昭陽秋清月如練  
笙歌嘈嘈夜開宴  
長信宮中辭輦人  
獨倚西風詠紈扇  
傾城自古有褒姒  
紅顏失寵何須怨  
冷冷玉漏掩重門  
一點金釭照書卷

神絃曲

紫桂飄香九萬里  
三山地色如凝水  
水妃骨冷不能眠  
金簪素指敲冰絃  
冷冷玉泉滴貝闕  
閨壑發鮫泣  
幽碧青瞳小髻歌  
繁霜飛風起江低  
昂瞳曨紫燄出海樹  
天清月落空相望

短歌行

涼風西來夫氣清  
雲飛水落山崢嶸  
髮膚剝削稜骨生  
鮮芳蒸悞成枯莖  
百蟲哀號百竅鳴  
凡有形色皆不平  
成之孔艱壞厥輕  
羈人含愁起夜行  
列星滿天河漢橫  
繁思攢心劇五兵  
天高何由達其情  
歸來託夢通精誠

長歌行

秋夜夜長月照軒  
夢見天神與我言  
確靈循環周四垣  
四時迭代成寒溫  
枯榮生殺相為根  
我於萬物何怨息  
生丁其時命所存  
六淫洶湧無鍵關  
由其弗約離其魂  
春葩敷披夏實繁  
外美中瘁誰能翻  
風霜涸寒肅不騫  
納華收真歸本元  
掃滌浮穢夫何冤  
我今語女開女昏  
生生殺殺無窮源  
歛女旨



蓄守女門扶桑赫赫片朝暎

燕歌行

霜飛動地燕草凋沙飛石走天蕭條江河倒影陵谷搖白日  
慘淡晝為宵美人迢迢隔雲霄青冥無梯海無橋魚枯鴈死  
星芒消沉沉思君不自憫愁如驚風鼓春潮歲云暮矣山寂  
寥梧桐葉落空乾條崑崙層城阻且遼蒼梧九疑煙霧遙瓊  
田瑤草芟薶莠江籬澤蘭成艾蕭登高望遠肝肺焦安得羽  
翼搏長飈

江南弄七首

江南細水細綺波江南絲女雛鳳歌疑嘖引睇紆青蛾紆青

蛾舒窈窕網軒綉戶鎖嬌春不放杜鵑來木杪

雄龍呼雌江底鳴山搖谷殷江波驚餘音不斷隨風征隨風  
征入湘竹截玉鑽星吹向天楚江六月無炎燠

湖波澄明日色鮮畫鷁相隨出采蓮嬌紅曼綠鬪春妍鬪春  
妍倚徘徊今朝花盡且歸去明日更有新花開

河曲懸匏涓濱竹碧鮮削出藍田玉輕翎參差飛羽謾飛羽  
謾幽簧含丹櫻瑤笳調清吹月明紫鳳來穆穆

采菱女子木蘭船翠裙紅袖青玉鈿搖光蕩影惜婣娟惜婣  
娟愁又暉拔蒲歌斷鯉魚入歸去芰荷香滿衣

江草萋萋春渺渺江臯出遊多窈窕輕霞衣裳碧雲嬾碧雲



媚紅日斜鴛鴦飛過綠渚去東風吹落菖蒲花  
巫山峇峴巫峽長瑤姬出舞朝雲翔翠葩  
媿媿金支光金支  
光丹葉絕寶鷄為使鳳為驂去雨來風樂無極

步出夏門行

步出夏門遙望滄海九河茫茫碣石安在魚龍滄溟日月曠  
藹三山何所弱水泔泔羲和曷往鼇極孰宰發鳩之羽其心  
不改安期不死桃實可待悠哉沛乎歌以永慨

丹霞蔽日行

彤霞何煌煌蔽此白日色炎埃被九野照灼后土赤朱陵開  
火府熺爛相蕩射山蒸絳紅氣川瀉丹砂液穹玄爰光曜衆

草相烜赫迥迷河林舊高奪昆侖碧鬱華不能神跋鳥巴化  
魄女媧在青天歲莫還鍊石

烏生八九子

樹上烏一生八九子相呼啞啞聒人耳何不學銜泥燕和鳴  
集桃李又不學鷹與隼奮翅高飛碧雲裏胡為巢此庭樹間  
啄腐吞腥饕吻甯少年挾彈如流星禍機潛發不見形翅翎  
摧折身首磔螻螳傷殘誰女惜

猛虎行

君不見昔者牛哀病七日化作猛虎形躩踞衣裳佩帶換毛  
尾棄置衽席眠茅茨怒牙出吻目閃電頃刻不識妻與兒昨



日燈前相咲語豈意今朝化為廝嗚呼世上茫茫化廝人祇  
應化心不化身

行路難二首

君不見水上漸徃來倏忽隨波移又不見花上蜂東枝飄落  
尋西枝世人食葵不食蕖莫倚結交心匪石君不見避席武  
安人即是當年實家客

君不見白日光不照幽草心又不見石上雲層寸遂成陰世  
間會合良難得况有巧言能樂金伏波稟葬魏碑仆當時豈  
是非知音智謀啓疑忠逆耳平地反掌生崎嶇行路難愁最  
深

野田黃雀行

野田雀觜啄啄朝食山下禾暮食山上粟千百為群叢薄裏  
忽然驚飛若蜂起飛飛却落稻田中衆口齊啄稻為空農夫  
力田望秋至沐雨梳風盡勞瘁王租未了私債多况復尔輩  
頻經過野田雀鷹隼高翔不汝擊農夫田父愁何極

何當行

念離莫悲歌悲歌慘於哭思鄉莫望遠望遠傷心目九疑迢  
迢隔湘川空山落日啼杜鵑梧桐摧折鳳凰去蛟蜃出沒波  
滔天令我四顧心茫然淚如懸崖瀉流泉樊桐有路到玄圃  
何當飛墮王母前



射虎詞

長戈如林夾弓弩言向深山射猛虎  
獠兒蒙鶻走如風阿過  
犬羊皆為空紛紛散入人家宿  
丁男上山婦女哭前行聞  
心先畏一馬當頭萬夫棄  
折弓墜刃委如土却向人前作威  
武

苦哉行

雞不可使守門狗不可使司晨  
驅車梁弱水日暮空悲辛  
我欲乘風謁閭闔虹蜺弥天雲霧合  
九關虎豹森駭人長跪陳辭  
闈不答錯石作璣璠鬼神驚見欺  
截梁為構榦般垂拊膺  
快交頤衝風結玄冰道惡不可履  
巫咸上天去澤凍神著死

我欲竟此曲此曲多苦聲  
鴻鴈向天北因之寄遐情

起夜來

微月就沒銀河爛城烏啞啞  
夜將半憂愁不寐攬衣起  
仰看明星坐待旦威弧歷落連天狼  
兩旗欲動風不揚槐根王侯  
夢未覺豈知雞聲堪斷腸

長相思

長相思妾在天南君在北  
紅顏未必無人知葑菲不美君玉  
食相思迢迢隔天河長夜不眠愁  
奈何欲憑魂夢到君所君門  
九重虎豹多長相思向誰道涼風  
日夕吹桂枝可惜釵香暗  
中老



無愁果有愁曲

君不見陳家天子春茫茫後庭玉樹凝冷光樓船江上走龍  
陣宮中只報平安信酒波灑灑蒸粉香暖翠烘烟妬嬌鬢無  
愁老夫貂鼠裘降旗搖動臺城秋生綃束縛檻車去始信人  
間果有愁

妾安所居

憶昔嫁君時紅顏豔春華今與君別離明珠化為沙女兒嫁  
夫願偕老何異青衫纏蔓草一枝一葉俱有心生死長當兩  
縈抱誰言妾心君不知芳蘭委棄同蒺藜妾欲有言君不見  
君車遙遙妾空戀君家大宅荒路隅可憐棄妾安所居

放歌行

鴻鵠搏紫霄鴉鳩守苞桑豈惟異所志羽翼有短長玄陰變  
白晝閭虛侵太陽一鹿走中原熊虎競騰驤植竿成壘壁舉  
袂為挽槍叱咤倒江河蹴蹋摧山岡犬牙據險要瓜瓣割土  
疆六奇誇曲逆三略稱子房磨牙各有伺裂膚遙相望龍蛇  
未分明智力正爭強孔明魚得水毛遂錐脫囊霧晦豹始變  
海激鵬乃翔嗟爾獨何為抱己自摧藏

鴈門太守行

赤符復漢祚褒德先侯封陽燿燭發錄霜催山鳴鍾馴雉集  
中牟乳虎去弘農枹鼓夜無聲桑陰麥芄芄循良一何多謠



歌滿兒童賢哉洛陽令卓魯相繼蹤  
擿姦若明神外猛中有容正獄除煩苛  
平賦寬畸窮黎民拜恩惠吏卒服至公  
身歿德不隳絃歌祠廟崇望美安陽亭  
頑懦興廉風彼哉肉食者輿馬愧盲聾

豔歌行

亭亭松柏樹結根幽澗隈高標拂雲日  
直幹排風雷曾經匠石頑謂是梁棟材  
明堂未構架厚地深栽培熒星入天闕  
武庫一朝災搜求到櫟樸谷赤山城垓  
般爾死無人鉤繩付輿臺路阻莫白致  
棄之于草萊天寒斧斤集歲莫空摧頽  
三光無偏照四氣有還迴斷喪在湏臾  
成長何艱哉孰知真宰意

悵望使心哀

門有車馬客行

門有車馬客云是故鄉人執手前借問  
鄉語知情真自云別故鄉觀光京國塵  
經商涉代北薄宦往西秦繡鳳錦鴛鴦  
金鞍紫騏驎結交貴公卿出入擁衆賓  
劇孟氣方銳郭解家不貧但見三春花  
寧思秋露晨斷蓬失其根風沙歛漂淪  
前途塞虎狼故里荒荆榛昔為橫海鯨  
今為涸轍鱗話言未及竟涕淚各盈巾  
居家倚骨肉出家倚交親何當在異縣  
見此舊里鄰園蔬如蜜甘市酒若醴醇  
悲歡且棄置生死同苦辛短歌有深情  
情深難具陳



煌煌京洛行

齊謳且輟唱，吳趨亦停聲。請君傾耳聽，聽我歌洛京。京洛何  
煌煌，卜宅自周王。五服畫九州，茲為土中央。用文四戰地，恃  
德不恃強。叔世道雖微，靈源瀉流長。漢祖殪秦項，定都由于房。  
馬上得天下，繼周焉敢當。光武起白水，龍飛掃挽搶。應天順  
民心，戡暴安痍傷。冕旒正宸極，圭組崇俊良。功臣列爵土，循  
吏勸耕桑。詔書報臧馬，玉闕閉西羌。周嚴播高風，卓魯樹甘  
棠。廷無乳廟伏，邑有馴雉翔。涓涓醴泉液，燁燁朱草芳。繼體  
更賢能，守成不踰常。南郊尊上帝，宗祀親明堂。辟雍養耆德，  
靈臺觀祿祥。南宮畫元勳，東觀昭文章。詩書母后訓，淫侈蕃

封防百年天，再開四帝日。重光傾曷自，滿盈宴安生。怠荒刑  
官竊，威柄義士死。道旁鬻積千里草，一星黃大命。始不  
摯餘暉，尚悠揚典午。亦有初言治，稱太康用人。混哲否孽芽  
出，蕭牆兄弟相咬食。同氣成豺狼，金墉豈不固。清談漫洋洋，  
妖星入太極。胡雛登御床，銅駝荆棘沒。寢廟狐狸藏，落日照  
西城。寒雲歸北邙，輾轅無人行。伊洛廣且長，衰榮若旦暮。道  
德信金湯，殷勤京洛篇。厥鑒不可忘。

升天行

太儀轉神樞，日月飛兩丸。榮華如電火，瞬息無留顏。誰能與  
螭蛄爭鳴，秋草間中夜。集五靈，步虛欵天關。擺脫塵土累，廓



落真境寬王髓充晚食瑤霞足晨餐妙合五色光化為九轉  
丹洞朗照無極道遙出人寰象載六蒼虬翼以雙紫鸞濯足  
北河津弭節蓬萊山伶倫歌九韶眉連舞七盤浮丘吹參差  
宓妃鳴佩環娛樂竟日夕還歸玉宸班

長安有狹邪行

大道坦蕩蕩狹路能摧車大道少人行狹路爭走趨狹路險  
以捷大道平而迂所以狹路間疊足不憚劬嶒嶮磨為光穴  
均輾成渠峻滑無澁踵攀緣有辜裾駟驪踣蹄蹉僕從頽肩  
呼清霜晨入袂白霧夜沾襦擾擾極追奔營營競湏臾窮通  
乃定命得喪豈異途君子遵義路詭御非吾驅滅趾禍難悔

素履戒勿踰那能慟阮籍何用泣揚朱長安有狹邪雖捷焉  
所如

飛龍引

軒轅黃帝上天時五龍垂翼下接之後宮綵女咸相隨雲輿  
龍捷不可追綵女化作黃金芝千年一作花花光五色明朝  
霞扶踈蔭映玉皇家沉精降液為丹砂鍊丹砂成水銀水銀  
流汞浴火輪火輪照耀十二辰黃龍歸來天帝噴

春思

憶昔東風入芳草柳綠花紅看總好今日風吹陌上塵鷺啼  
燕語俱傷神憂來感人淚沾臆未必春光不如昔



靜夜思

靜夜思一思腸百轉啼螢當戶聽不聞明月在庭看不見方  
將入海刺猛蛟復欲度嶺邀飛猱胸中倏忽亂憂喜得喪紛  
紛竟何是靜夜思思無窮天雞一聲海日紅滿頭白髮吹秋  
風

華山畿

華山畿勞勞渚割棄父母思相隨黃泉去男婚女嫁當及時  
標梅不見周南詩王風蕩蕩散荆棘帷薄日夕生狂癡當歌  
悵然有所思華山畿何足悲

冬暖行

孟冬十月暖桃李花盛開胡蝶草間出飛上花枝來蝶知愛  
花為花出不知冬暖無多日霜風一夕花作塵墜粉飄黃愁  
殺人

節婦吟

淒切復淒切綠萍初生池水竭蘭根壓霜芽不茁春風冷冷  
逐秋月蓼蟲食苦甘如酒卷菴雖生心已朽揚州青鏡蝕土  
花玉匣瓊臺復何有君不見人間日月如飛梭地下相從應  
始多

登高丘而望遠海

登高丘望遠海長風簸浪高於山蓬萊宮闕無光采雲霧翳

案前天



陽谷義和安所之鯨鯢作隊行鱗鬣如朱旗精衛銜石空有  
心口角流血天不知登高丘望遠海弱水浩蕩不可航一望  
令人玄髮改

江上曲

江上風吹沙石走江中濤浪如牛吼鄂君繡被寒無香江水  
不如殘夜長

北風行

城外蕭蕭北風起城上健兒吹落耳將軍玉帳貂鼠衣手持  
酒盃看雪飛

銅爵臺

高臺突兀連蒼宇中有艷質如花紅君王已作西陵土總帷  
玉座空秋風向陵舞罷寒月白蒼狐夜啼松浚滴冢中枯骨  
寧有知翠袖珠袍為誰色當其奮臂譙許間手揮群雄如刈  
菅橫矛賦詩逞豪傑猛氣可以移南山寧知暮年壯心死遺  
教但聞令賣履啼噓涕泣兒女態遺臭至今猶未已君不見  
永安宮中顧命時天下英雄人得知

薤露歌

蜀琴且勿彈齊竽且莫吹四筵並寂聽聽我薤露詩昨日七  
尺軀今日為死屍親破空滿堂魂氣安所之金玉素所愛棄  
捐篋笥中佩服素所愛淒涼樹悲風妻妾素所愛洒淚空房



權賓客素所愛分散各西東  
離者自相快親者自相悲有耳  
不復聞有目不復窺譬彼燭上火一滅無光輝譬彼空中雲  
散去絕餘姿人生無百歲百歲復如何誰能將兩手挽彼東  
逝波古來英雄士俱已歸山阿有酒且盡歡聽我薤露歌

沐浴子

沐髮不如清神浴身不如洗心仁義非外鑠治容防內淫登  
山望漢京樓觀蔚欽岑軒車擁衡禹几杖尊雄歆著書擬周  
孔吐論躋騫參青衿來濟濟白日去駸駸驅車泗水曲攬纒  
長淮陰悠悠黃石畧杳杳天風吟盛時不可再感歎為沾襟

秋閨曲

天上傷心月秋來情更親那能照幽獨不照遠行人

蓮塘曲

落日下蓮塘輕舟赴晚涼偶然花片落飛出兩鴛鴦

蒿里曲 三首

澗草萋萋泉汨汨紫蘭香老棠梨發山中無人松柏寒卧聽  
狐狸嘯明月

白楊樹頭風惻惻寡鳥悲啼山月黑殯宮冷落清夜長銀鴨  
金鳧不堪食

山花冥冥啼子規鳥銜紙錢掛花枝山中遊人莫相笑君到  
此中當自知



促織詞

草間小蟲名促織夜夜隔窓鳴不息小兒側足潛聽聲雕籠  
鏡柵閉爾形金錢縱閉爭相妬得勝轉多為轉固高秋九月  
嚴霜飛開籠却放枯蔓歸舊穴無蹤故惟去生死淒涼向何  
處

銜泥燕

銜泥燕尾涎涎銜泥點汚几席間更捉飛蟲撲人面銜泥燕  
人言爾巢長滿尺主人倉廩多蓄積借爾葦屋好安居年年  
壘巢生爾雛

秋思二首

蕙草芳已歇候蟲寒不鳴相知惟白髮日夜滿頭生  
露出階苔光風生庭樹冷推窓掩明月不忍見孤影

寒夜曲

蟾車軋露迷圓景金井輓轡僵素綆孤鸞叫破海天雲嫦娥  
淚滴方諸冷十二樓開春醉醒千年斷石生曾青林霏散漫  
紫府曙白莎黃葛空殘螢

古鏡詞并序

金陵武生於勾曲野人得古墓中鏡李桓先生辨其款製  
燕石上有元康年字定其為漢時物今雖不能灼見其非  
晉而漢然其來之不近則明矣



百鍊青銅曾照膽，千年土蝕萍花壓。熏想得玄宮，初閉時金精  
夜哭黃鳥悲，魚燈引魂開地府。夜夜晶光射幽戶，盤龍隱見  
自有神物，豈肯長湮淪。願借蟾蜍騎入月，將與嫦娥照華  
髮。

琅琊王歌四首

駿馬須好鞍，彊弓須勁箭。將軍不知兵，健兒空自健。  
香羅金縷衣，采花弄春暉。花高折不得，空步綠莎歸。  
出門無情親，大道行亦窄。寄與遠遊人，屈貧勝為客。  
四通八達垠，瑯琊道快馬。如龍踏烟草，草淒淒煙漠漠。陌頭風  
起，桃花落。

長相思四首

長相思在瀛洲，蓬萊之山忽沉浮。弱水無風亦倒流，鯨魚一  
吸吞九牛。旋淵呀呷鳴其喉，青鳥飛去天悠悠。嗟我欲往徒

離憂

長相思在蒼梧，九疑愁雲隔明都。湘神淚滴湘水枯，冥冥霧  
雨啼短狐。楓林沉陰天色曠，鳳皇不食鷓鴣呼。嗟我欲往空  
長吁。

長相思在昆侖，黃河怒浪訇天門。天開石裂龍駿奔，羲和縣  
車光未暎。岷峨雲埋蜀帝魂，流沙千仞沉轡轅。嗟我欲往難  
窮源。



長相思在玄冥寒門六月天雨水天關凍折天柱傾女媧鍊  
石補未成石鱗迸落如流星龜蛇上訴愁帝青嗟我欲往勞  
心形

殘絲曲

玉樓十二春如綺日暖清池躍魴鯉空聞無處着柔情  
殘絲撲天起天南河漢天西流豈知少年能白頭便喚姮娥  
栽桂樹花時相約月中遊

拜新月

月生花始開月圓花漸落花開人少年花落人可憐女兒拜  
新月望圓不望缺未圓望不休既圓應更愁

自君之出矣

自君之出矣雲鬢愁不縮思君如轆轤倏忽心百轉

美人燒香詞

翡翠釵梁雲作葉膩紅深暈桃花頰玉奴纖手捲蝦鬚繡羅  
襪小不勝扶低頭背人整裙帶神前獨自深深拜翠袖輕迴  
香霧分細語悠悠聽不聞門外遊人空駐馬冥冥白日西山  
下

築城詞

君不見杭州無城賊直入台州有城賊不入重門擊柝自古  
來而况四郊多警急愚民莫可與慮始見說築城俱不喜一



朝城成不可踰挈家却向城中居寄語築城人城高固自好  
更須足食仍足兵不然劔閣潼關且難保獨不念至元延祐  
年天下無城亦不盜

畦桑詞

編竹為籬更栽刺高門大寫畦桑字縣官要備六事忙村村  
巷巷催畦桑桑畦有增不可減淮備上司來計點新官下馬  
舊官行牌上却改新官名君不見古人樹桑在墻下五十衣  
帛無凍者今日路傍桑滿畦茅屋苦寒中夜啼

買馬詞

驛官亭鼓鼙鼙打驛使星馳買官馬府官奔走群吏趨呵叱  
縣官如使奴一時立限限鄉後馬價頓增無處覓賣田買馬  
來納官買時辛苦納時難縣官定價府官減驛驢也作駑駘  
看歸來拊膺向隅泣門前索錢風火急

神祠曲

路傍古廟壁半斜雨滴香案堆坭沙槎牙死樹當道卧樹上  
紙錢猶未化春秋祭祀知幾時烏鴉得食號相隨人人歡喜  
得好玃低昂拜跪山花飛寧知禍發在旦夕空村無煙唯瓦  
礫廟傍烏鴉亦不來獨留土偶眠蒼苔

雨雪曲

北風吹塵沙雨雪日夜深三足之烏毛毳飛不遠白晝慘淡



成幽陰青天冥冥不可覩，水有罔象路有虎。平民避亂入山谷，編蓬作屋無環堵。回看故里盡荆榛，野鳥爭食聲怒嗔。盜賊官軍齊劫掠，去住無所容其身。嗚呼彼蒼何日回春陽，北風雨雪斷人腸。

苦寒行

去年苦寒猶自可，今年苦寒愁殺我。去年苦寒凍裂唇，猶有草茅堪蔽身。今年苦寒凍入髓，妻啼子哭空山裏。空山日夜望官軍，燕頷虎頭聞不聞。

遠客歎雨

遠客暮年筋力寡，入門無家出無馬。冷風一夜雨瀟瀟，平明

道上泥沒腰，竈下濕薪不生火。敲冰取水指欲墮，僕夫怨怒呼不前。終日忍飢掩關坐，憂來傷心令髮白。人生百身豈為客。

久別離

久別離，別時小兒未解語。今日踉蹌庭下來，向人問爺淚如雨。兒知有爺未曾識，爺有母在愁何極。明庭不奏采薇詩，久別離當語誰。

苦熱行二首

南風吹雲不成澤，朝霞暮霞山谷赤。赤松羽人潛大荒，火府朱陵氣相射。蜚廉翅站不能奮，薜號眼枯口流液。遠客魂銷



畏締綌

憶昔伏波南伐時，穿岸為宮。炎氣青草茫茫起，瘴烟吹蟲  
含沙總堪畏。人生惜死非兒，但有馬革可裹屍。武陵之曲  
何傷悲。

梁甫吟送鄭希道入京

老翁生長平原里，但見平原路如砥。謂言路平無嶮巖，車輪  
不摧馬如飛。今日驅車上梁甫，回頭却憶平原路。梁甫吟愁  
我心。

望遠行俟後舟不至作

望遠行，日日望來，腸欲斷。數遍南風下水船，愁中白日偏難

晚順風，順水不易得。欲去又愁來者，遠望遠行，一望令人白  
髮生。

女兒割股詞為徐勉之作

女兒少小幽閨裏，深掩重簾學針指。施朱傅粉有母憐，一朝  
無母將焉恃。青燈背壁月當戶，峴山之禽夜啼苦。丹元訴天  
天為愁，淚洒長河作飛雨。嗟兒與母同為身，母子分離何苦  
辛。抽刀割股，股不血。一念自感皇穹仁，吾聞孝慈出天性，人  
心至誠天必聽。兒股有肉，母所育。母生兒死兒亦足。

巴陵女子行

巴陵女子天下奇，石作心肝水作脾。生平見義不見已，投淚



恨殺襄陽兒臨終裂素寫怨語生氣猶能起風雨君不見虎符繫頸東海檣令人愧死巴陵女

秦女休行

秦家女兒美且都齒如編貝唇如朱有生不幸遭亂世弱肉強食官無誅兄朝出門暮不返家人悵望空倚閭女休聞之肝膽裂奮臂不惜千金軀援矛一擲白日滅仇血上濺天糝糊市人驚譟塵土沸邏卒奔走馳金吾有心殺人寧惜死顧謂女吏何其愚嫚法長姦誰所致舍生得義吾何逋精誠通天為惻赦書一夕來宸極路旁觀者咸歎嗟女休出門無喜色君不見景升本初之子空是男亡家破國令人慙

蠻中歌二首

小兒負薪早已歸大兒采螺虛不回海上檣竿齊入浦山頭雲起颶風來

祝融廟前稻欲齊椰子如瓠壓枝低烏鴉亂叫祭鬼罷枕柳樹裏鷓鴣啼

閩詞六首

戎馬閑山隔空閨鬢髮華將何寄消息江樹總無花昨夜三更夢分明見所思覺來驚枕席心跡兩相疑塞鴈南還北江湖西復東佳人不可見霜雪萬山空別却燈花盡從教污翠鈿幾回虛報喜誤妾不成眠



小小雛渠鳥雙雙入畫樓樓中人怨別愛爾不知愁  
欲寄音書去書成之便郵持書上樓望淚洒鷓鴣裘

烏啼曲

可恠烏鴉鳥鳴聲不喜人如何好彊聒故博主人嗔

五雜俎

五雜俎原上翻往復還小販客不得已潯沲發

五雜俎百衲衣往復還燕雙飛不得已賦式微

五雜俎市賣果往復還郵傳馬不得已死垓下

春江曲

江上風帆日日歸獨自狂夫音信稀無因化作鷓鴣鳥隨着

耶舡到處飛

公子行

玉勒金鞍照地光駝裘珠帽繡文章平明上馬歸來醉他日

清朝作棟梁

仙人詞三首

王府仙人冰雪姿生來卽遣侍瑤池五雲隔斷塵凡路說着  
人間總不知

上帝宸居儼蕭森九闕扇豹立峯峯群龍自有三珠樹不見  
扶桑水淺深

東海鯨鯢白晝游南溟風浪湧吞舟三山亦在滄波裏自是



神仙未解愁

黃鶻曲

黃鶻雙飛中路分，關山風雪隴頭雲。  
雲深雪暗知何處，哀叫聲聲天上聞。

吳歌五首

儂做春花正少年，郎做白日在青天。  
白日在天光在地，百花誰不願郎憐。

承郎顧盼感郎憐，準擬歡娛到百年。  
明月比心花比面，花容美滿月團圓。

便道逢春花合開，誰知穠豔有人猜。  
山鷄不入家鷄侶，野果

難同園果栽

蛾眉二八不曾愁，有色無媒郎不留。  
月裏蟾蜍推落地，幾時再得廣寒遊。

栽花圖作看花人，誰料花開不及春。  
昨夜狂風今夜雨，為花落得兩眉顰。

采蓮歌六首

十三女兒白似脂，向人學得做嬌癡。  
折得白蓮頭上插，苧羅山下賽西施。

十五女兒花正開，隨群逐伴采花回。  
濃粧比似花嬌艷，引得黃蜂隊隊來。



采得紅蓮愛白蓮，雙橈快轉怕人先。  
爭知要緊翻成慢，菱葉中間絆却船。

芍藥爭春銜彩霞，芙蓉秋盡却榮華。  
有色有香兼有實，百花都不似蓮花。

女伴相隨出芰荷，並船比較采蓮多。  
擡頭忽見遊人過，權入菰蒲水拍波。

晚涼風定却回船，望見新月在天邊。  
放下荷花深深拜，翻身忙整翠花鈿。

竹枝歌十二首

人間日月去如梭，快活無多辛苦多。  
欲識江南古來意，請君

聽唱竹枝歌。

相思無益莫相思，贏得霜髯換黑髭。  
明月自圓還自缺，蚌胎瘦減有誰知。

陽臺雲雨漫荒唐，巫峽啼猿枉斷腸。  
莫向蒼梧山下去，九疑愁色滿瀟湘。

瀟湘江水接天河，第一傷心是汨羅。  
斑竹岡頭蘭蕙死，菖蒲龍上艾蒿多。

榮華未必是榮華，園裏甜瓜生苦瓜。  
記得水邊枯楠樹，也曾發葉吐鮮花。

若要開花須護持，花枝怕雨怕風吹。  
抽條結蕊千辛苦，糝土



埋苔一霎時

彎彎月子似簾鈎掛在梧桐樹上頭月裏姮娥知何處人間  
離別未為愁

昨夜星光照濕泥五更依舊雨淒淒懊惱人心難測度說道  
東方却在西

杜鵑花開不着忙石蓮花落却恹惶壚頭酒盞休懸望裁衣  
無尺莫思量

莫見乾藤道是香莫見白石道是羊布帘賣酒齊誇好甜辣  
須還到口嘗

鼃鼃在水廂在山登山入水早防閑別有一般真叵耐蝦蟆

生在月中間

望帝無端化羽毛無朝無暮口嘈嘈見說天高三萬里吻乾  
舌出也徒勞

江南曲七首

江北垂楊未爆芽江南水綠萬重花北人盡道江南好江南  
纔到便為家

金陵好是帝王州城下秦淮水北流惆悵江南舊花月女兒  
盡作北歌謳

洞庭湖色碧於藍瀟湘日融花欲酣黃雀樓中留醉客懶人  
天氣是江南



錢唐勝地作南都，  
紉綺如雲隘廣途。  
想得燕山風雪夜，  
斷魂相語怨西湖。

桃葉渡頭春水平，  
莫教城上曉鶯聲。  
中原無限英雄淚，  
併入江南送別情。

無情白日去如梭，  
有限青春可奈何。  
江北風沙人住少，  
江南杭稻鴈來多。

生長吳儂不記春，  
鄉音旋改踏京塵。  
丫頭小妓相偎坐，  
衆裏矜誇是北人。

前溪曲

前溪送別溪水滿，  
石楠花落蒲葦短。  
春風無情看復秋，  
莫學

落花隨水流

長門怨

不學周南詠小星，  
空悲玉殿鎖娉婷。  
黃金漫買相如賦，  
猶勝無辜送掖庭。

山鷓鴣六首

女兒未始會穿針，  
將去高麗學語音。  
教得新番鷓鴣曲，  
一聲淮擬直千金。

鸚鵡能言百鳥驚，  
鷓鴣叫噪阻人行。  
珊瑚軟語呈嬌媚，  
不似班鳩得拙名。

溪深不比海子深，  
一物從來有一心。  
野鳧趕魚溪上去，  
鷓鴣



飛過野鳧沉

黃茅壠上雨和泥，苦竹岡頭日色低。自是行人行不得，莫教空恨鷓鴣啼。

鷓鴣元是嶺南音，嶺北無人識。此禽南人唱歌過嶺去，此人相向淚沾襟。

山禽一處一般聲，不是鄉音便動情。多是江南子規鳥，天津橋上對人鳴。

浣紗女二首

娟娟腰肢玉一圍，姁紅嬌綠淡春暉。莫教名字傳宮掖，終遣詩人刺綠衣。

月新終夜泣孤臣，落月飛霜幾度春。能使姑蘇聚麋鹿，誰知却是浣紗人。

雙帶子四首

嫁時雙帶綉麒麟，翠葉金花色色新。寧教塵匣蒙蛛網，不肯將來別贈人。

結得同心欲寄郎，還將雙帶刺鴛鴦。殷勤祝付西歸燕，一紙書緘淚兩行。

合歡雙帶繡蜻蜓，一度看來一度青。雪裏芭蕉心長在，春來不改舊時青。

莫言長夜便無明，莫道離鸞不合并。天上星辰能化石，黃河



千歲也還清

雞鳴曲二首

霜飛月落天崢嶸  
咿咿啞啞鄰雞鳴  
龍蛇雜遝寰海沸  
誰知此聲非惡聲

莫厭晨鷄相應啼  
中原千里絕晨雞  
一匡自是無管仲  
坐談不用誇曾西

塞姑三首

苔沒行蹤草沒堤  
滿簾紅日一鷓啼  
天涯那得真消息  
不敢逢人問磧西

腸斷龍沙信不通  
夢中長怕醒時空  
夜來忽得榆關報  
却憶傳聞是夢中

滿篋衣裳手自裁  
寄君親付與郎開  
錦衾角枕期窵遮  
莫無人莫寄回

春曲二首

春天不雨亦不晴  
楊花飄盡池萍生  
庭鳥雛成巢燕暝  
惟有杜鵑啼到明

春晴野煙生綠塘  
春遊綵女鉛華光  
碧雲日暮去何處  
紅苧白蘋他自香

楊柳枝詞九首

多事垂楊管送迎  
長條折盡短條生  
不知幾許東風裏  
猶帶



輕烟冒晚晴

漢將營中萬樹春。朱旗曉色動星辰。可憐烟雨章臺路。翠縷斜縈走馬塵。

楊葉淒淒隱畫樓。楊枝嫋嫋弄輕柔。鳴鳩呼罷黃鸝語。肯信年華有素秋。

憶昔春風白下亭。桃紅李白柳青青。繁華一夢今何在。露葉依稀似淚零。

長干橋邊楊柳枝。千條萬縷鬱金絲。人來人去爭攀折。無復青青映酒旗。

淮水春晴碧簾紋。楊花楊葉總成雲。錦帆零落美人盡。枝上流鶯誰獨聞。

二月垂楊綠葉齊。無朝無暮子規啼。飛花袞袞向東去。却被東風吹向西。

枝上穠花吹漸稀。樓前楊柳正依依。春風解釋佳人恨。故卷繁陰放燕歸。

長江春水去悠悠。亂絮輕花取次休。落日高樓怨橫笛。寒鴉飛盡暮蟬愁。

宮怨二首

沉沉煙雨掩孤闌。可恠東風到得遲。今日晴明上樓望。不知花謝已多時。



何處春風拂苑牆。飛花片片入昭陽。多情尚有池邊柳，留得啼鴛伴日長。

女兒子

女兒二六月上弦，嬌羞長在阿婆邊。阿婆惜愛女兒兒，只愁阿婆死。

太師誠意伯劉文成公集卷之十終

太師誠意伯劉文成公集卷之十一

巡按直隸監察御史縉雲後學樊獻科編次

歌行

送陳庭學之成都衛照磨任

君不見岷山導江戒南紀，噴雨噓雲九千里。瞿唐劍閣鍵重關，錦城花繞成都市。雄藩作屏鎮羌夷，列郡五十爪牙之長。夏雪山連太白，玄冬熱海蒸坤維。

聖皇握符御宸極，煙塵不起鯨波息。鳳凰麒麟在郊藪，川后嶽靈俱效職。籌邊樓上羅俊良，况子敦學年方將。將軍幕府曾試用，驂騑熟路宜騰驤。六編揚帆泝江水，東風漫漫吹蘭



芷絲衣鶴髮對晨昏有酒盈尊甘且旨吾聞嵒嶽上與井絡  
通風氣隔閔華與戎九夷八蠻濡帝澤廟堂已得攻心策。

望早對為玉輔卿郎中題雪灘寒鴈圖

雲茫茫水浪浪林木脫葉無稻糧烏啼鴈叫天蒼涼歲云莫  
矣江山長有竹有竹在高岡三株凍折兩復僵小禽悲飛不  
能揚蒼梧悠悠隔沅湘欲往從之川無梁願披寒霄見朝陽  
勿令嗷嗷傷我腸

題漁樵問答

樵問漁江湖風波惡何似采薪人無憂茹藜藿漁答樵山中  
何所有未若擢扁舟得魚即沽酒

題王元章梅花圖

會稽老王拙且癡能畫梅花稱絕奇春牕走筆生古恠中有  
窈窕傾城姿人生得閑真是好得閑不閑惟此老布袍闌茸  
髮不梳一生只被梅花惱天生梅實可和羹爾梅有花結不  
成世間花實總尤物不如畫圖終古無枯榮

琴歌贈劉元明

龍門獨樹水蠶弦空林霜清鳴暗泉姮娥抱桂寒不眠離鸞  
恣啼風滿天碧潭殷雷龍起蟄月落太陰山鬼泣湘江秋水  
一劍明帝子歸來聞珮聲扶桑浪翻碣石改東海魚飛入西  
海白雲去盡天茫茫十。二。玉。樓。深。夜。涼。



憶昔盤古初開天地時以土為肉石為骨水為血脉天為皮  
崑崙為頭顱江海為胃腸嵩岳為背脊其外四岳為四肢四  
肢百骸咸定位乃以日月為兩眼循環照燭三百六十骨節  
八萬四千毛竅勿使淫邪發洩生瘡痍兩眼相逐走不歇天  
帝愍其勞逸不調生病患申命守以兩鬼名曰結璘與鬱儀  
鬱儀手捉三足老鴉脚踏火輪蟠九螭咀嚼五色若木英  
身上五色光陸離朝發暘谷暮金樞清晨還上扶桑枝揚鞭  
驅龍扶海若蒸霞沸浪煎魚龜輝煌焜耀昏幽暗燠煦草木  
生芳蕤結璘坐在廣寒挂樹根漱嚙挂露芬香菲啖服白兔

所擣之靈藥跳上蟾蜍背春騎插光弄影蕩雲漢閃奎燦壁  
葩花摘手摘桂樹子撒入大海中散與蚌蛤為珠璣或落岩  
谷間化作珣玕琪人拾得喫者臍臆生明暈內外星官各職  
職惟有兩鬼兩眼晝夜長相追有物來掩犯兩鬼隨即揮刀  
鉞禁制蝦蟇與老鴉低頭屏氣服役使不敢起意為姦欺天  
帝怜兩鬼暫放兩鬼人間娛一鬼乘白狗走向織女黃姑磯  
槌河鼓褰兩旗跳下皇初平牧羊群烹羊食肉口吻流膏脂  
却入天台山呼龍喚虎聽指麾東岩鑿石取金卵西岩掘土  
求瓊巖岩冒洞書石梁折驚起五百羅漢半夜撥刺衝天飛  
一鬼乘白豕從以青羊青兔赤鼠兕便從閣道出西清入少



微浴咸池身騎青田鶴去採青田芝仙都赤城三十六洞主  
騎鸞翳鳳來陪隨神鬼清唱毛女和長烟裊裊飄熊旂蜚廉  
吹笙虎擊筑罔象出舞奔馮夷兩鬼自從天上別別後道路  
阻隔不得相聞知忽聞韓山子往來說因依兩鬼各借問始  
知相去近不遠何得不一相見叙情詞情詞不得叙焉得不  
相思相思人間五十年未抵天上五十炊忽然宇宙變差異  
六月落雪冰天達鼉鼉上山作窟穴蛇頭生角角有岐鱗魚  
掉尾斫折巨鰲脚蓬萊宮倒水沒楣攬槍枉矢爭出逞妖怪  
或大如甕盎或長如蛟蛇光燦燦形躩躩叫鹿豕呼熊羆扇  
吳回翔魁魑天帝左右無扶持蚊蠶蚤蠅蚋螭嗜膚啞血

圖飽肥擾擾不可揮筋節解折兩眼瞠不辨妍與媸兩鬼大  
惕傷身如受榜笞便欲相約討藥與天帝鑿先去兩眼翳使  
識青黃紅白黑便下天潢天一水洗滌盤古腸胃心腎肝肺  
脾却取女媧所搏黃土塊改換耳目口鼻牙舌眉然後請軒  
轅邀伏羲風后力牧老龍告泰山稽命魯般詔工倕使豐隆  
役黔羸礪斧鑿具鑪鏡取金蓐收伐材尾箕修理南極北極  
樞幹運太陰太陽機檄召皇地示部署岳瀆神受約天皇擇  
生鳥必鳳凰勿生鳥與鷓生獸必麒麟勿生豺與狸生鱗必  
龍鯉勿生蛇與蠃生甲必龜貝勿生螭與蜃生木必松楠生  
草必薺葵勿生鉤吻含毒斷人腸勿生枳棘覃利傷人肌螟



蝗害禾稼必絕其蟻蚋虎狼妨畜牧必遏其孕孽啓迪天下  
蠢蠢氓悉蹈禮義尊父師奉事周文公魯仲尼魯子與孔子  
思敬習書易禮樂春秋詩履正直屏邪歌引頑嚚入規矩雍  
雍熙熙不凍不飢避刑遠罪趨祥祺謀之不能行不意天帝  
錯怪恚謂此是我所當為眇眇末兩鬼何敢越分生思惟呶  
呶向瘖盲洩漏造化微急詔飛天神王與我捉此兩鬼拘囚  
之勿使在人寰做出妖恠竒飛天神王得天帝詔立召五百  
夜叉帶金繩將鉄網尋踪逐跡莫放兩鬼走逸入嶮巖五百  
夜叉箇箇口吐火搜天刮地走不疲吹風放火烈山谷不問  
杉栢樗櫟蘭艾蒿芷蘅茅茨蟠焱熨灼無餘遺搜到九萬九

千九百九十九仞幽谷底捉住兩鬼眼睛无活如琉璃養在  
銀絲鉄柵內衣以文采食以麋莫教突出籠絡外踏折地軸  
傾天維兩鬼亦自相顧咲但得不寒不餒長樂無憂悲自可  
等待天帝愈怒解猜惑依舊天上作伴同遊戲

寄江西黃伯善兄弟

我思美人乃在洞庭之陽彭蠡之陰衝波亘天三百里離恨  
比之應更深揚瀾咆哮左蠡怒白日慘慘玄猿吟欲往從之  
憤余心奮鬣駝旒不可以駕風縱縱兮兩遥遥望厭原之飛  
烟邈匡廬之高岑霞標日觀轟南斗石門隻闕撐欹欹虹旌  
兮翠羽昌容兮鳳凰舞夜衣兮藍襟玉笙吹兮紫鸞音望不



見兮悲莫任。江水湛湛愁楓林。西來文魚曾到海。願寄筆札逾  
兼金。國靈之尚。冬。對。日。賦。高。南。卡。石。門。雙。關。對。碧。卷。五。五。

題安仁余氏留餘堂

君不見石季倫對案方丈皆八珍。珊瑚夜光視如土。寧知滄  
沒同埃塵。又不見李贊皇平生鼎食滿萬羊。中厨烟火宵未  
冷。詔書趣使趨南荒。金谷名園委蔓草。平泉荆棘無人掃。榮  
華瞬息可奈何。空令過者傷懷抱。世人積金貽子孫。一朝金  
盡難復論。古來天道有好還。君看漢代于公門。無憂於自下  
送胡季城平江監倉

君不見崇谿沙中金。又不見龍門山上桐。衝波蕩汨入坎窞。  
石溜漱齧歌雷風。梓人桃氏不見顧。自分委棄蒿櫟同。一朝  
清廟作雅樂。搜索絡繹奔垂工。飛廉鼓鑄王爾斲。熾炭利鑿  
相冶礪。朱絃橫絙筍簾立。鎮圭衮冕齊雍容。世間物理有消  
息。累土自可成穹隆。司倉雖微君莫棄。君不見魯叟當年嘗  
委吏。

弋陽方氏壽康堂

先生築堂依林臯。繞屋杉松浮翠濤。烏皮靈壽扶鶴髮。項有  
千歲隻垂條。小孫踉蹌竹馬戲。大孫綵衣花底翔。有耳不聆  
闕闐音。有目不識簿領曹。鸞啼燕語日高起。羽觴汎汎浮春  
醪。君不見非熊老人釣清渭。九十鷹揚亦勞瘁。



為杭州鄭善止題蓬萊山圖

君不見大瀛海中有神嶽如崑崙周遭四城五十里石骨纏繞扶桑根琪華爛日珠炫夜翠樓玉殿虎守闈鍾山燭龍在其北兩眼燁煜如朝暎仙人東王公掌握天紀弼帝尊長虹為轅龍作馬飄然乘風白日在下弱水蕩蕩無力可負芥自從大禹刻石之後來者寡彼秦之皇其貪如狼而漢之武其欲如虎樓船萬斛空巍巍欲到不到風掣之徐市蜉蝣身乃欲邀安期文成五利小豎子羊質彊使蒙貔皮神仙大咲起濤浪射魚海上夫何為

壽山福海圖歌

吾聞軒轅之國乃在大海之中央其不壽者八百歲壽者乃與天地同久長樓臺縹緲造雲漢赤日繞戶扶桑涼玉泉之水清以香瑤草之味如瓊漿洪崖有時來環佩聲琅琅鳳凰自歌鸞自語青蜺連蜷白雲舞淋漓豹髓浮瑤觴金盤薦麟脯耳聞楚水泣皇英眼見商郊葵彭祖琪華玉樹宵有光東風入律春茫茫春茫茫樂無極青雛夜夜月中來廣寒姮娥寄消息

送人分題得鶴山

丁令威乃在崑崙之墟閬風之巔羽衣誤作塵土夢回首人世三千年空中落日松栢冷苦霧慘慘含悲泉夢隨回飈訪



瓊田紫雞青鴨還相憐  
丁令威將奈何野有矰繳  
隰有網羅前飛鳥鳶後  
駕鵝啄腥爭腐聲嘒嘒  
渺予懷兮隔烟蘿杳冥  
冥兮倚長歌丁令威胡  
不歸槐江之山連大駮  
玉樓金嶂中天開玲瓏  
碧樹鏘瓊瑰鳳凰有閣  
鸞有臺君胡為兮獨蒿  
萊丁令威歸去來

寄宋景濂四首

我思美人乃在仙華之山  
山前夜半掛河漢天津  
兩旗俯可攀我欲從之  
阻河關初平不來白羊  
死瘦骨蝕盡莓苔頑風  
沙蕭蕭隔人間玄霜日  
夕凋玉顏有鳥有鳥丁  
令威側身上下空孤飛  
女媧石墜齧脚折海水  
散作雲霏霏山中有奇  
樹

華一千秋美人何不折寄我使我歎恨長疑眸深沉洞谷山  
鬼集陰氣六月水霜留嗟哉美人誰與儔明年定約赤松子  
與尔群峰頂上遊

有美一人兮美且仁自我不見兮不知幾春仰玄穹兮睇參  
辰為合為離兮孰測其因青冥無階兮江海無津風雨茫茫  
兮蛟龍怒噴安得羽翼兮致我與隣

有美一人兮美且都青霞為衣兮白雲為裾被秋蘭兮佩珣  
玕泰和與將兮中黃與居瞻望弗及兮芳歲其徂山高水深  
兮道阻且紆安得羽翼兮致我與俱

有美一人兮在山中蒼眉黑鬚兮玉璽其容飲沆瀣兮食紫



虹淩石泉兮灑清風，  
邀初平兮從赤松。  
趨道遙兮樂無窮，  
安得羽翼兮致我與同。

題謝臯羽傳後

阮籍哭窮途，墨翟哭素絲。  
賈誼上書期，寤主卞和抱玉無人知。  
人生有情不可塞，謝生慟哭非狂癡。  
神奔鬼遁天地革，龍魚貓虎三辰黑。  
黼裳玄衮換，鼙鼓唱羌歌。  
滿中國生也何辜，逢此時有才不用空男兒。  
伯益丘墟管仲沒，狐根弱植誰扶持。  
既不能學申胥，頓首血沾臆。  
却具再建荆社稷，又不能學解衍長號。  
徹帝關飛霜六月，凄燕山空將淚灑。  
荒岡雨添作秋濤，撼江浦君不見杞梁之妻善哭夫。  
哭得城崩又何補。

夜猿叫罷天晦冥，哭聲搖動虛危星。  
蕭湘竹死鳳凰去，但見白波連洞庭。  
嗚呼此士今安在，金石可銷心不改。  
應將魂魄化精衛，銜取南山填北海。

松陽周處士水壺歌

水壺者枯蒼周處士之所以自號也。  
夫水太陽寒水之凝而壺者器也。  
水凝為冰至柔而變為剛天下之剛莫尚焉。  
壺之貴者以玉為之雖栗而冰乎其腹。  
僕切異之於是乎歌以詠焉歌曰

陰風吹空寒凜冽，玉壺夜半玄冰結。  
十二樓中瑣翠鸞，太微宮裏縣明月。  
明月流光照玉壺，珠飛上天滄海枯。  
青女鍊霜



封貝闕燧人炳犀龍泣血銀河凌澌膠北斗五色石裂媧皇  
走相看一笑天茫然回首人間三萬年

寶林同講師渴馬圖歌

天廐馬神龍姿目如明星耳如錐拳花鬣毛雲陸離揚鬚掉  
尾頰虹飛天廐馬閑且驕繫以青絲勒以鑣渴不得飲瑤池  
泉飢不得食瓊田苗豆粟不實中腸枵口不能語足屢躑天  
廐馬壯且武食主之食須報主莖秣失時罪在牧圉無如宋  
牂怨不得爵咀喪厥元戎殄師旅天廐馬爾不聞趙國廉將  
軍一飯斗米肉十斤被甲據鞍走若雲北斬粟腹西拒秦負  
荆謝蘭不為身至今天下稱良臣又不聞漢季劉荊州有牛

千斤角曲觶啖食十倍於常牛負重不若一牝鹿老瞞度江  
俘楚囚骨肉解割庖刃游天廐馬飽爾食草間封狼追誅殛  
威弧撥刺矢不直嗟爾神駿須盡力他年定遇田子方櫪上  
優游終主德

青羅山房歌寄宋景濂

若有人兮乃在大江之南荆河之東連山掎拔瀛海上上與  
河鼓天津通憶昔四女下天來遺髮墮髭根龐鴻仙華傑出  
寂恠異望之如雲浮太空嶽峯列旄鬣齧不可上蒼蔚雜樹  
昏腫隴虎龍咆號猿鶴叫山鬼呵歛生悲風嗟哉若人兮胡  
為乎其中梁檀栲兮柱桂楓結青蘿兮以帡幪不翦不伐兮



不監以攻晨嵐暮藹滴晴雨烟條霧葉相蒙龍繆繆兮纏纏  
葦葦兮蓬蓬繚糾要紹兮若蒼龍垂胡降玄穹焚麗披離兮  
若翠鸞振迅飛蕤氈鸚黃和鳴桑扈應髮鬣牙曠之絲桐幽  
泉發竇鏘玲瓏六月赤日收蘊隆陽凌陰蓄春融融巖花澗草  
紛白紅有時皇初平清夜騎羊朝帝君瓊蕊羽蓋冰玉珮華  
月閃爍光成虹松吹笙兮竹舞翻影旆旆兮聲淪淪娛目悅  
耳兮樂不可言世間塵土何夢夢山有芝隰有豐石斲斲兮  
水滢滢猗若人兮美且充飢食倦息兮可以保我躬逍遙兮  
棲遲又何必訪廣成于崆峒

題仲山和尚群魚圖

濠梁之樂誰能寫  
蜃死後無畫者  
上人安知身非魚  
援毫  
貌出態更殊  
剡藤素拂秋雲冷  
眼見滄江未翠尾  
輕披  
水上萍玉鱗倒漾  
空中影  
前行十二相迴環  
吹澗沫淵  
潭間最後群趨儼  
成列皎若寒霄舞  
流雪却思昨夜風  
雨來赤鯉已去隨  
奔雷鯁鱸不作霄  
漢夢潛心泳暖何  
悠哉贈言還  
畫重太息芒鞋竹  
杖今何適慎勿作  
海水洶湧龍崢嶸  
空令素壁凝塵生

為本大師題唐臨晉帖

乾符天子萬機暇  
宮中扈從多儒冠  
玉堂開宴出晉帖  
翠氣  
蕩搖山雪寒侍臣  
模寫各臻妙碧樹  
瓊柯相照耀令我  
嗟嘆



詩意集卷十一  
至尊喜內官拜舞宮娥咲日斜宴罷歸內園外門有事人不  
言吾不見關東夜飛赤白丸昭陵玉匣秋風酸

題老翁騎牛圖

白日上悠悠竹梢霧已收晴天不易得及時當放牛鄰家放  
牛多兒童我家無光只老翁寒衣在機織未就原上烈烈多  
高風勿言衰老筋力薄有牛可放殊不惡但願天公不相惱  
牛肯閑眠飢亦好

題也先進德祖母徐氏節義傳後進德之祖以戰死  
時其祖母年尚少

鳳乃鳳之匹麒麟乃麟之傳錦衾角梳期白髮誰知不得同山  
丘丈夫殉節殞烽火英靈在世何曾死兩龍未合延平津白  
日無光天色紫君不見青松與兔絲引蔓相纏紫松摧絲蔓  
斷結根猶作千歲苓洞房含風霜露早孤兒啞啞在懷抱皇  
天可憐兒長成相見黃泉情亦好

題金谷園圖

君不見石家名園擬黃屋蜀錦作圍金作谷暖香烘日浮紫  
霄冰紈火布鮫人綃燕釵十二歌白苧珊瑚玲瓏綠珠舞月  
榭吹笙引鳳凰霧幄傳觴語鸚鵡燭下蠟光宵未歇樓上佳  
人碎瓊雪空將遺恨寄丹青留作千年覆車轍

初夏即景



前日大熱釋我裘，昨日一雨涼如秋。寒暄倏忽又覆手，冰炭着身何由瘳。今朝初晴又欲暖，園中草芽輒復抽。嗚呼安得伶倫吹嶰竹，四氣不愆同玉燭。

畫竹歌為道士詹明德賦

我所思兮在瀟湘，蒼梧九疑渺無際。但見綠竹參天長，上有寒烟凝不飛。下有流水聲琅琅，中有萬古不盡離別淚。化作五色丹霞漿，穿崖貫石出厚地。風吹露滌宵有光，我欲因之邀鳳凰。天路脩阻川無梁，孰知畫史解人意。能以造化歸毫芒，虛堂無人白日靜。使我顧盼增慨慷，玄霜慘烈歲將宴。鼙啼叫天悲涼，我所思兮杳茫茫。山中紫筍春可茹，歸來無

使遙相望

題蘭花圖

幽蘭花，在空山。美人愛之不可見，裂素寫置明窓間。幽蘭花，何菲菲。世方被佩，薜藂菴。我欲紉之充佩褱，眾獨立。眾所非，幽蘭花。為誰好，露冷風清香自老。

送葛元哲歸江西

東山水音

入問

我昔筮仕筠陽初，官事窘束情事踈。風塵奔走僅五稔，滿懷荆棘無人鋤。明堂大開壯梁棟，散木不遺椽梲用。豫章江上一逢君，矯矯雞群一孤鳳。城頭月出明星稀，開門望月露沾衣。文章繡衣郎，談屑天葩飛。得句即高歌，驚起鳥鵲穿林霏。



詩意仙文集 卷十一 十三 英  
星流雲散隔吳楚，有時夢君詩上語。座中百谷含清暉，窓外  
飄風度踈雨。我住青山耕晚霞，君去蟾宮折桂華。別來八見  
秋雁過，忽然會合增長嗟。江南二月草未秀，雪陣如濤袞清  
書。投壺命觴盡文友，此樂百年何日又。一朝復一朝，三歲如  
過電。四牡彭彭子獨賢，江東山水看遍人。問事萬齊我馬向  
南君，向西海門日照漁浦白。驪歌欲斷吳雲低，枯蒼山臨川  
水相思迢迢一千里。山高高兮水深深，極望不見愁人心。應  
將旅魂夢化鶴，采夜月明懷好音。

題釋驂圖

關中小兒勇而競，玉帳貔貅三百乘。馬知道上十二牛，皇天

默佑周同姓，絳宮大厲吼如雷。墨車載甲光照纓，鷹騰二陵  
間。劍鋒白皚皚，壯士百戰腦塗地。元帥束縛坐草萊，俘囚有  
血堪釁鼓。自分殘膏染齊斧，萬死一生直望外。豈意片言由  
內主，鴻鴈魯傷弓尚為空。卷愁犀兕脫匣出，聞呼肯回頭。河  
邊解驂徒譟謀，舟中稽首心悠悠。濟河封尸勿云晚，此事終  
作晉國羞。君不見夫差適子胥，空灑姑蘇泣。丈夫深戒婦人  
仁，養虎遺患悔莫及。

題錢舜舉馬圖

吳興公子雅好奇，欲把丹青競天巧。花蜂柳鶯看已足，貌得  
驂騑圖更好。浪花滿身蹄削礪，兩耳抽出春筍尖。風鬣欲拂



九霄霧隅目似掛高秋蟾  
作者王良失鞿鞞封狼咆哮蛇豕  
關天開乘黃越在野出車未見歌  
南仲嗚呼安得此馬背負  
郭令公掃清四海歸奏明光宮

題王元章梅花圖

道人紅顏映髭雪欲與梅花鬪  
清潔夢魂化作梅花神貌得  
梅花最奇絕高軒落筆當晴曦  
北風吹樹寒雲垂九霄露洗  
珠玉盡野水影動龍蛇枝  
勞生苦被煩熱惱見此令人暢懷  
抱虛堂夜半明月入玄鶴一聲  
驚絕倒西湖處士骨已槁湖  
上淡烟迷蔓草石壇日夜長  
蒼苔紫脫瑤英為誰好羅浮山  
在何處聞道其間無散木  
只有梅花三萬樹黃初平在  
金華

山中白羊許借我與爾並駕凌飛霞

題縣崖蘭花圖

洞庭一夜西風起沅湘美人隔秋水  
翠蕤玉佩冷不收怨入  
蒼梧九千里蒼梧之山絕浮烟上與女媧所鍊之石相牽連  
瘦根迸雲石為穿紫莖瓊蕊涓飛泉一開一落三千年歲晏  
玄霜白日晃南山桂枝化為棘我欲采之無羽翼月宮青鸞  
呼不來卧看月明空太息

題雪汀圖

天迷迷地茫茫雲垂日白江水黃  
踰鳥凍縮龍走藏雪花如  
月開棹桑彼何人斯一葉航手持釣竿詠滄浪詠滄浪倚道



謫意仙文集 卷十一 十五  
遙天風吹入瑤池去素女素娥應見招

為董楚芳題山水圖

金庭接四明會稽藏禹穴半嶺生白雲如濤湧溟渤我住城南隔天鏡朝夕看山見山性是誰模寫作畫圖展向高堂色相映天上寶書緘石室翠栢蒼筠曉蕭瑟有蛟如龍身九屈林深嶂疊不見日龍氣吐為烟霧出何處樓臺香靄中蓬萊只在雲門東陽崖不留建木影陰澗自起樵人風賀知章今已矣湖邊酒船為誰艤赤城霞標通宛委陵茗花開落松子蕙帶荷衣歸去來清泉素石無泥滓

寄陶中立郭秉心叙舊言懷

為別未五載恍如生死隔有時長想愁欲狂中夜感歎無羽翼憶昔相逢俱壯年錢唐柳綠花含烟粉墻繚繞子雲宅華燈照幙自草玄春城飛雪滿一月立馬敲門馬蹄沒銅壺驍箭三十六易坐更投鏃相扞仰天大笑催命觴酒多雪急天茫茫論文握手到爾汝知有膠漆無參商君行却向江東去我亦棲蓬廣文署震澤風驚白鴈秋玉山露落青楓暮井邑蕭條劫火餘行人何處問緘書傳聞那得辨真假引領遙望空嗟吁今年飄泊越城裏重見手書悲且喜舊游雖在舊人非獨立看雲淚如水羨君絳帳開海濱綵衣堂上生陽春艱危大幸適樂土况有主翁賢且仁嗟余數與時不偶畫虎不



成抵類狗家鄉蕩析身轉蓬棄置田園事奔走豺狼在郊蛇  
在藪府縣官曹但糊口藩垣又厭邊鄙報旄丘載馳徒疾首  
郭公子今何如璞中之玉可照車委棄土壤慚砒砒往事轉  
頭同過翼猿鶴蟲沙豈終極南山直幹劈雷電般匠束手  
無顏色殷勤寄情素會面未有期願言努力各自慰莫遣青  
鬢先成絲

和吳以時秋夜長篇

秋夜長今日何日此何鄉流螢在砌苔在墻明星滿天月照  
床東西南北路渺茫車何為乎水中央秋夜長今日何日此  
何鄉

潛溪圖歌為宋景濂賦

金華山水天下希潛溪龍門尤絕竒群峰峻極河漢上一峯  
獨立芙蓉陂先生結廬在其下文追班楊兼賈馬遂令此山  
增壯觀野有樸楸皆梧檟上清道士方方壺乘輿為作潛溪  
圖丹崖翠麓神仙居東望日出樹如蘇溪流穿林還度谷十  
里一達五里伏龍湫吐景生白虹藤蘿振兩松呼風却憶往  
時清夜月帝女乘雲下天闕鍾鏞鏗鈞蕭鼓發霓裳羽衣飄  
滅沒初平騎羊前啓行長髯鬚鬚飛玉霜秦娥吹笙玄鶴舞  
牽牛河鼓凝寒芒相思迢迢頻入夢夢駕兩鸞從一鳳覺來  
毛髮猶爽浙目送征鴻度空碧山有蔬水有魚幽澗有泉清



可對何時上疏乞骸骨寄聲先遣雙飛鳧

題陸放翁賣花叟詩後

君不見會稽山陰賣花叟賣花得錢即買酒東方日出照紫陌此叟已作醉鄉客破屋含星席作門濕螢生竈花滿園五更風顛雨聲惡不憂屋倒憂花落賣花叟但願四海無塵沙有人賣酒仍賣花

題柯敬仲墨竹花石

紅桃花夭夭綠竹葉巖巖水邊石上相依倚恰似佳人配君子奎章博士丹丘生寶書鑑盡芸閣清染朱涅翠歸墨筆收入造化無逃形烟濃風暖春如醉竹有哀音花有淚花枯竹

死今幾年空留手跡令人憐

為包與直題太一真人圖

太一真人龐眉頰不知所持何代書既不學昴星降精下輔隆準公又不學傳說請帝通夢寐左右商王陳範謨眇然一葉蓮花莖清秋風吹落泥塗紅凋粉瘵不可扶君何為乎以為桴蕩漾九河凌五湖誇耀水伯驚天吳坐令文成五利之輩假借神聖欺庸愚靈旗風翻壯荆符驪鹿無鬼夫何辜漢宮天祿連石渠金釭銜壁麗綺䟽青藜有燄如芙蕖何不分餉依光夜績之徐吾高堂耽耽縣畫圖作歌一咲駭里閭

為戴起之題猿鳥圖 牧谿畫



巴東之西巫山高連峰插天關健牢中有懷凌鮫谷之波濤  
藤蘿杳冥風怒號人跡不到神鬼逃但見野猿沙鳥群相嘈  
聲取百竅搖巖磬此景可聞不可遭爾何為乎貌以毫毛嗟  
我用心無乃勞江盤峽束雷雨昏崩崖死樹纏古根玄猿抱  
兒隨白猿長臂嫵媚相攀援舔啖譎詭趨騰蹇懸柯攫石墜且  
掀上有滿月如頰盆箕筥桃枝寒自蕃嘉實不食鳳高翻但  
見娥皇女英之淚痕勢窮險盡原野闕落日烏鴉繞雲黑扶  
花茫茫蘆葉赤前飛鵠鷓後鳧鷖瀟湘洞庭烟水碧騶虞鸞  
鷲無顏色還君此畫長太息獨立看天淚沾臆

題界畫金山圖

岷山導江入海長金山却在江中央下有地軸連扶桑上有  
鳥道通九陽白波繞之如雪霜杳然浮空或低昂但見危樓峻  
閣造半斗似蓬萊之鏘鏘撞金伐革殷朝夕丹雘翠葩相焜  
煌巖崖洞谷蛟龍堂斑鱗錦紋頰頰張隱嶙窈窕變暄涼虎  
蹄豹跡萬古不可到海若夜出烟霞香摩尼之珠明月光目  
連持來自西方謂能驅遣毒泯消災殃轉惡為善回妖祥嗟  
我欲往不能翔畫中忽見心飛揚涉水有壘野有狼武陵桃  
花今渺茫浩歌一曲增慨慷

題界畫卧龍山樓閣圖

巍巍乎大海之西浙河之東是日會稽夏后所封吞雲吐雨



隔躔次闔闢光景調春冬地平天成五千載職貢長與中華  
通洞天石室神仙宮香爐紫氣騰芙蓉禹穴窈窕潛蛟龍玉  
書金簡今無踪但見蒼松翠柏掩曉閉白日猿狖叫嘯生悲  
風卧龍何蜿蜒向之離立如孩童上有朱薨碧瓦縹緲浮玄  
竅流星穿牕月掛戶下視水木光玲瓏多年不見嘗膽處野  
花自落莓苔中綠籟香飄楊柳濃漁舟一葉波溶溶黃冠賀  
老已寂寞澹烟細雨空青楓雁山狂客意匠工能以翰墨偷  
天功對此使我心神融便欲築室依巖從短衣瘦策尋葛洪  
嚙服石髓餐晴虹翩然遠逐浮丘公不須懷古意慘戚伯夷  
綺季俱蒿蓬

陳彥德以畫見贈歌以酬之

君不見昔者米南宮又不見今時趙學士能將翰墨爭鬼工  
天下流傳名父子枯蒼處士身姓陳小郎英俊尤可人欲收  
大地入掌握筆意所到如有神曉携小幅來贈我紅日滿窓  
花婀娜開軒展視心眼寬如在岳陽樓上坐湖波吹烟入遠  
山君山乃在湖中間蒼梧九疑隔湘浦孤雲目斷幽篁斑漁  
舟一葉來何處巫峽雨昏啼鴉暮澤畔行人久不歸沙上輕  
鷗自飛去陳公子聽我歌深林大谷龍蛇多蓬萊三島可避  
世欲往其奈風濤何

長平戈頭歌



長平戰骨煙塵飄，歲久遺戈金不銷。野人耕地初拾得，土花  
漬出珊瑚色。邯鄲小兒強解事，枉使泥沙埋利器。四十萬人  
非少弱，勇怯賢愚一朝棄。陰坑血冷秋復春，朽壤食盡蒼蛇  
鱗。湮淪長愧杜郵劍，廢墜空憶椿喉人。故壘中宵鬼神入，雲  
愁月暗戈應泣。嗚呼當時豈無牧與頗，戈乎不遇可奈何。

涇縣東宋二編修長歌

浙東行人過江左，正值黠賔之管吹。輕葭陰氣黯黯天地閉，  
仰面不見扶桑鴉。谷風哀鳴灌木應，兩脚四垂如亂麻。崩湍  
湧溜汨奔會，平地礮齧作臼窪。便疑桑田變滄海，流汞熒眼  
無津涯。管茅披猖黃竹拜，蛙黽狼籍助喧譁。滿路青泥雜隕

籜，局縮畏觸蛭。與蛇破瓦荒畦舊，市井荆榛穢與巢麀麋。翠  
眉蟬鬢轉蓬去，頽墻缺甃劫火煨。善淫禍福不可料，韶豔天  
闕令人嗟。叢祠佛殿總銷歇，但見木偶眠泥首。前度長洲絕  
短澗，輿從沾濕水沒膝。寒颺瘁瑟透衣袖，雖有氈蓋那能遮。  
水邊老鶴學人立，鷺鷥侍傍如小婢。廢田蔓草結旌旆，農夫  
盡化為蟲沙。布穀不知時事異，勸耕終日聲查查。晚來雨歇  
到涇縣，只有蒿莸無人家。縣官趨迎入公廨，筋學骨解肉半  
麻。蕭條破竈冷灰地，飢童凍口張哈呀。澤沲麥飯那能致，新  
豐酒醪何處賒。古稱悲歌可當哭，莫恠咲謔同兒哇。夜深月  
出照庭樹，鬼磷一似青蓮華。驚魂遁魄稍歸舍，收入志慮無



令邪愁雲苦霧子規叫起坐更盼羲和車

為張生題趙仲穆畫馬

天廐之馬高且肥王孫貌出真絕竒杜陵寒儒恒苦飢枉使  
韓幹遭誚唾漦注天馬龍象力朝發太蒙暮西極豆芻五石  
充一食力由食生非外得地黃首蒼美如飴嚙以甘泉清肺  
脾神完氣定叱止時素餐立仗馬耻之高風吹鴈酸棗紅狼  
烟夜半通回中為君長鳴起子公斬取郅支歸獻明光宮

為詹同文題浙江月夜觀潮圖

君不見四時平分成歲功以秋繼夏獨不同炎官挾長握天  
柄七月赤日熺玄穹暮收抱鉞蹲白水野氣赫赫攄頰虹陽

侯喘汗河伯喝少昊上訴愁天公會須萬物長養遂期以仲  
月虛宵中此夜姮娥魄正滿命駕四蟾驂兩駝指揮禺強出  
玄渚蕩滌歇煬清霾蒙河漢發源牛斗下曲江上與天津通  
初看一髮起溟徼如曳組練來於東漸聞殷駢鼉鼓發倏忽  
萬雷聲撼風天吳掉尾出溟滓馬銜揚鬣招海童霓旌縞帳  
鷲羽博瑤臺十二浮空濛紫珠仙人乘玉輅騰駕鶴鵠飛氄  
氄長庚歛霍挾光耀電母扶龍喙戛銅宓妃起舞素女從瓊  
珮綵繚雲幘幪冰綃霧縠紛颯纒霜旂雪旛高翳空鯨魚呀  
呷鮫鰐道蒲牢哮吼馮夷宮瞿唐巫峽起平地灑瀕若象鑿  
回瀛先驅已過赤亭嶂後從始發龕山嶺商聲爽浙合群籟



澤國凜凜寒欲凍先生翫月坐樓上夜氣澄寂神和冲憑闌  
快覩煩暑退呼兕命酒澆喉嚨自舞自歌歌自作月照白髮  
三千總歌聲迤颺林壑應竹樹戛擊絲與桐淵魚躍波棲鳥  
作紫桂繞屋清香融君歌曲終響未終我歌激烈留征鴻瞳  
眸相視俱老矣况有衆病來交攻  
聖明天子御宇宙威惠與天相比隆首丘倘許謝鞿絆猶有  
古月光臃腫行當唱和三百首永與潮汐流無窮

戲為雪雞篇寄詹同文

我為先生歌雪鶴逸興翩翩入寥廓先生為我詠雪鷄扶桑  
晝景寒淒迷雪鶴排雲舒六翮長鳴遠逐浮丘伯玄洲巨君

張兩耳聳人踉蹌走如蟻雪雞欲上蟠桃枝白光爍眼流瓊  
藕騰身蹋折琅玕樹片片琪華振鷗鷺鶴飛撥刺向遼東海  
鯨揚波雪半空縞衣攤襪丹頂素九臯月黑猿嗥風雞啼喔  
咿夜方永驚起跋烏怨金井群仙環珮響玲瓏十二玉樓烟  
霧冷憶昔康回觸折天柱時女媧扶天立天維坤維太白作  
天骨萬古至今長積雪上有雪蛆大較長如轅水蛇雪鼠相  
蝕蜿味如餗餠色如乳入口清凉生肺腑炎埃蕩滌邪穢除  
幽精爽雪游六虛鶴也莫與烏鴉爭腐鼠雞也莫向溝塍拾  
禾黍雪寒可畏清可欲洗髓伐毛天所玉雪可嚙兮水可餐  
誰其作友三青鸞



題米元暉瀟湘圖

米家父子皆好奇戲弄筆墨如小兒三百年來傳幾手坐見  
銷鑠同春澌丹青馳譽士所耻勉強徇物寧非癡蒼梧之山  
鬱欬嶷重華往矣空寒颶猿啼鳳去竹迸淚白日慘淡令人  
悲瀟湘洞庭連鄂渚江漢波濤動荆楚不見軒轅張樂時水  
妃怨泣鮫人語問君此圖何處得中有遠意衆莫識君不見  
岐陽石鼓字泯滅千載猶為人愛惜

題趙學士色竹圖

竹性本孤直磬折良可憐由來剛介有摧挫歲寒然後知真  
堅虛堂無人清氣會日滿高林風影碎漆園胡蝶去茫茫冷  
綠嘉實晚不知鳳皇來不來

送黃巖林生伯雲還鄉覲省

生兒須男不須女二十辭家事

明主由來卿相出白屋志士寧甘守環堵天上巒宮古庠序  
濟濟衣冠鵷鷺羽學業須兼文與武濟川期舟早期雨懸髻  
看書困不眠劬心問道飢忘咀朝來忽覩林間鴉雛飛哺母  
聲啞啞慨想高堂缺溫清稽首天閣動

天聽春烟蒼茫春樹綠水煖芹芽白如玉扁舟蕩漾駛歸風  
綵服飄揚炫晴旭盈門弱柳鶯黃絲鶯鳴如絃花滿枝開門



見兒喜不定問言執手仍牽衣牽衣上堂拜嘉慶邊豆既具  
殺且時兒前勸酒還蹈舞親戚滿筵謹咲語朱顏婉婉映青  
松鶴髮嬋娟照芳醕為子歌一曲送子江之涓到家早來旋  
勿為兒女慈人生有親樂莫樂况乃

君恩重山岳讀書不可迂檢身不可踈勸子慎勿學世儒  
言耻行名為愚君不見良金鑄為器鼎彝亨飪干將利才全  
德備稱大賢報

國榮親兩無愧

送姚伯淵之清溪河泊所任

清溪之水通秋浦石白水清魚可數鯨鱗鱣魴與鱖小魚

如鍼大如杵侵晨漁艇浮空來千夫撒網雲烟回鳴榔擊楫  
聲如雷水怪駝珠宮開課魚使者矢魚急馮夷噓唏龍母  
泣琴高赤鯉縱有神何暇超騰作人立吾觀大江之中有壯  
魚名曰海豨頭如猪群行九十其朋徒歎沫成雨倏歛育風  
具旌陽仙人上天去已久平地波濤隨處有春淵潛鱗陟負  
冰時哉罔俾虞人後小魚瑣碎獺所捐大魚多膏祗自煎君  
不見振振鷺白如玉沙頭見魚飢不啄一朝飛上瑤華池紫  
鷄黃鵠相追隨俯視秃鶴垂六羽還共野鳥爭腐鼠

雙鯉堂歌為唐侍儀賦

君不見魯陽揮戈回白日又不見耿恭拜井飛泉出精誠自



古格皇天如響應聲非異術長江鯉魚龍伯臣三十六鱗紅  
錦勺梳丁尾丙宮淵淪乘駕朝夕扶桑津天憐孝子孝不置  
特勅水官宣德意玄冰躍出雙赤鱗頃刻寒谷生春溫之子  
高堂髮如絮每懷古人心是慕中庭鑿池專種魚魚行圍圍  
隨陶朱晨昏膳羞不遑索翠韭金橙鱸肥白中婦奉養少婦  
進大兒登歌小兒拍合歡花開庭草芳忘憂花開池水光凌  
晨上馬出門去彩袖披拂金爐香薄暮言歸拜堂祀何況有  
魚甘且旨忠孝由來同一軌努力揚名煥青史

舊在杭時為冷起敬賦泉石歌亂後失之今起敬為  
協律郎邀予寫舊作已忘而記其起三句因更足之

君不見吳山削成三百尺上有流泉發蒼石冷卿以之調七  
絃龍出太陰風動天初聞涓涓響林莽悄若玄宵鬼神語玲然  
穿崖達幽谷竽籟颼颼振喬木求懷帝子來瀟湘瑤環瓊珮  
千鳴璫女夷鼓歌交甫舞月上九疑啼鳳凰還思媧皇補穹  
碧排挾銀河通積石咸池瀉浪入重溟玉井冰漸相戛擊三  
門既鑿龍池高三十六鱗騰夜濤豐隆咆哮震威怒鯨魚捷  
尾驚蒲牢倏然神怪歸寂寞殷殷餘音在寥廓鮫人淵客起  
相顧江白山青煙漠漠伯牙骨朽今幾年叔夜廣陵無續絃  
絕倫之藝不常有得心應手非人傳憶昔識子時西州正繁  
華箏笛沸晨暮梵離僂僂爭矜誇子獨倘佯泉石裏長日松



詩意 伯文集  
卷十一  
二十九  
陰淨書几取琴為我彈一曲似掬滄浪洗塵耳否往泰來逢  
聖明有虞製作超莖英和聲協律子能事因俾夔摯專其名

太師誠意伯文成公集卷之十一終



